

✽ ब्रजभाषाग्रन्थत्रय ✽

श्रीचैतन्यचन्द्रामृतकणिका (१)

श्रीरासपंचाध्यायी (२)

भजनपद्धति (३)

प्रकाशक :—

वागा कृष्णदास

(ग्वालियर मन्दिर)

कुमुमसरोवर

पो० राधाकुंड (मथुरा)

पादशमी)

२०१६

❀ दो शब्द ❀

चैतन्यचन्द्रामृतकणिका—इसके रचयिता वृन्दावन श्रीराधारमणजी ठाकुर के घराने में प्रसिद्ध कवि, गोस्वामी श्री कृष्णचरणजी (उपनाम) कृष्णकवि हैं। प्रसिद्ध विद्वान् गो० बलदेवलालजी आपके पिता थे। उक्त ग्रन्थकार के पुत्र गो० नीलमणिजी महाराज से यह ग्रन्थ हमें मिला। जो कि श्रीपाद प्रबोधानन्द सरस्वती के प्रमिद्ध संस्कृत ग्रन्थ “श्री चैतन्यचन्द्रामृत” का सारगर्भ आधार ले प्रत्येक श्लोक का छन्द वन्ध पद्यानुवाद है। इसमें श्रीमन्महाप्रभुचैतन्यदेव की महिमा सर्वोत्कर्षता रूप से दिखलाई गई है।

रासपंचाध्यायीभाषा—रचयिता श्रीगोविन्दचरणदासजी, आपने वृन्दावन में सम्वत् १८८८ साल कार्त्तिकमास द्वादशी तिथी रविवार को इसकी संपूर्ति की। इसकी हस्तलिखित कापी वंगाच्चर में है जो कि किसी वंगवासी महात्मा के द्वारा लिखी गई है। अतः इसका प्रकाशन शुद्ध रूप से न होकर उसी रूप से हुआ जैसा कि कापी में भौजूद है।

भजनपद्मति—रचनाकाल सम्वत् १८४० है। इसमें स्पष्ट रूप से ग्रन्थकार का नामोल्लेख नहीं है परन्तु, शेष में “सम्वत् १८५० स्वअच्चरमिदं गोकुलदासस्य” ऐसा उल्लेख है। इसमें गोकुलदासजी इसके रचयिता हैं यह श्रीप्रभुदयालमीतलजी का अनुमान निराधार है। क्योंकि जब कि १० वर्ष पश्चात् ही गोकुलदासने इसका नकल किया तो ग्रन्थकार स्पष्ट ही पृथक प्रतीत होते हैं। आप श्रीराधारामोदरठाकुर जी के गोस्वामी श्रीगोविन्दलालजी जो कि श्रीपादजीवगोस्वामी जी की नवमी पीढ़ी में हुए उनके शिष्य थे। आपने उन सबकी सिद्ध प्रणाली इस ग्रन्थ में दी है। अस्तु भजन साधन में यह बड़ी उपादेय वस्तु है। (कृष्णदास)

श्रीश्रीचैतन्यचंद्रामृतकणिका

चखन चखावन प्रेमरस, नन्द सुवन चैतन्य ।
 प्रकटे नदिया नगर में, सो वन्दूं श्रुति धन्य ॥ १
 पाय जनम जिन कियो नहिं, धर्म सुजन जन संग ।
 वन्दों जिनकी कृपा सों, नाचत प्रेम उमंग ॥ २
 हरि रस मदिरा मत्त जिन, कियो सकल संसार ।
 श्रीश ब्रह्म जाने नहीं, महिमा रूप अपार ॥ ३
 योग यज्ञ जप तप नियम, निगमागम नहिं जाय ।
 सोई पावत पुरुष जब, प्रकटे श्री हरि आय ॥ ४
 अहह गहन गौरांग को, को जाने यह खेल ।
 अति पापी पावन किये, धर्म भक्ति निज मेल ॥ ५
 जो बिन पूछे बिन कहे, बिन आदर सत्कार ।
 देत बुलाय बुलाय कर, दीनन कर सत्कार ॥ ६
 वज्र हृदय नवनीत सम, पापी परम पुनीत ।
 किये गौर वपुधार जिन, भज मन तज जगतीत ॥ ७
 मुक्ति नरक सम देव पुर, लखत ख पुष्प समान ।
 गौर हरि के दास कूँ, कर मन ताको ध्यान ॥ ८
 चरण सुधारस पान सौं, मत्त गौर के दास ।
 विधि सुर मिठु मुनीन को, करत सदां उपहास ॥ ९
 दनुज दमन सृष्टी करण, हरि हर भूतल भार ।
 कहा कियो श्री गौर ने, तारो सब संसार ॥ १०
 अमिय अयन चैतन्य को, कोटि चन्द्र मुख चन्द्र ।
 भुवन मांहि बाढ़ो निरख, वारिधि प्रेमानन्द ॥ ११
 वन्दों श्री चैतन्य के, चरण कमल कर स्वार्थ ।
 पावत जाकी कृपा सो, प्रेमानिधि पुरुषार्थ ॥ १२

नाचत वाहु उठाय कर, गाय हरी के नाम ।
 देव देव चूङ्गामणि, गौर होउ मम धाम ॥ १३
 भक्त चकोरी चतुर चख, चाखत सो अविराम ।
 प्रकटो शची समुद्र में, गौर चन्द्र गुण धाम ॥ १४
 चखन लखन नव प्रेममय, बृष्टी कर मो माहिं ।
 वास करोगे गौर कब, हृन्मन्दिर के माहिं ॥ १५
 दुर्विचार रसमय महा, नाना भाव विकार ।
 राधा माधव रूप से, लखो गौर अवतार ॥ १६
 मोर पिंछ्ल गुंजावली, देख सधन घनश्याम ।
 श्याम निरख प्रेमा विवस, होत गौर गुणधाम ॥ १७
 अरुण वसन संध्यात्रसम, अमिय अयन मुखचन्द्र ।
 गौर चन्द्र मो हृदय में, उदय करो स्वच्छन्द ॥ १८
 गणना हित निज नाम की, गाँठ करत कटि दाम ।
 अश्रु पुलक रोमांच युत, सो पूरो मम काम ॥ १९
 हरत हृदय को अंध तम, संतापन को नाश ।
 गौर चन्द्र नख चन्द्रिका, मो हिय करत प्रकाश ॥ २०
 अंत भये मुनिगण जहां, शुक न जानो जाय ।
 जो न बतायो कृष्ण ने, देत गौर अपनाय ॥ २१
 ब्रह्म वेद की कथा अरु, शाख लोक की रीति ।
 तबलों जबलों नहिं भई, गौर भक्त से प्रीत ॥ २२
 प्रकट तेज प्रेमापगी, भक्ति विषय वैराग्य ।
 को कविगण नहिं कर सकें, गौरदास को त्याग ॥ २३
 मधुकर सम मो मत्त मन, वदन नयन कर पद्म ।
 चरण कमल लख गौर के, रमत वहाँ कर सद्म ॥ २४
 परिचर्या कर विष्णु की, तीरथ वेद विचार ।
 बिना गौर प्रिय कृपा के, को पायो श्रुति सार ॥ २५

अमृतोदधि को मर्थन कर, सार कोई जो पाय ।
 गौर चरण की कृपा बिन, कडवो सो मन भाय ॥ २६
 मधुर भाषिता मुग्धता, विह्वलता गांभीर्य ।
 विनय विषय को त्याग के, गौर दास को वीर्य ॥ २७
 कोई कोटि क गुरु करो, पढ़ो श्रुतिन को मर्म ।
 गौर कृपा बिन नहिं मिले, प्रेम भक्ति परधर्म ॥ २८
 करत ध्यान वैराग्य को, कोटिन को उपहास ।
 स्वतः सिद्ध प्रेमापगे, गौर चरण के दास ॥ २९
 अद्वैतादि भक्त गण, देख भये कृतकृत्य ।
 भाव विभूषित गौर को, अलख अनोखो नृत्य ॥ ३०
 हैंगे हाँगे ह्वेगये, भक्त जगत के माहिं ।
 गौर कृपा उन पर भई, यह जानूं मन माहिं ॥ ३१
 अज्ञानी मुनि जनन को, गर्व करावत त्याग ।
 श्रुति शिर सेवित शचीमुत, भजे सोइ बड़ भाग ॥ ३२
 सब साधन सों हीन भी, होय गौर को दास ।
 आश आपनी पूज कर, पर कौ नासे त्रास ॥ ३३
 शरण गही जिन हरी की, करके पुन्य अगन्य ।
 अनुपासित चैतन्य कूँ, मैं नहिं मानू धन्य ॥ ३४
 ब्रह्मवादि धिक यमी धिक, कर्मी धिक मन जान ।
 पायो जिन नहिं गौर मधु, ते नर पशु समान ॥ ३५
 श्वान पुच्छ सूधो करण, परि सिंचन पाषाण ।
 श्री गुरु गौर कृपा बिना, इमि सब साधन जान ॥ ३६
 सागर प्रेम पसार कूँ, भयो गौर अवतार ।
 लहै न जाने रत्न बहु, बो हेगो दे मार ॥ ३७
 गौर प्रेम रस सिन्धु में, जो नहिं छूबो हाय ।
 भव सागर के बीच में, पड़ौ सो गोता खाय ॥ ३८

प्रेमामृत मय गौर ने, खागर दियो बहाय ।
 अबहु जो जन दीन हों, उनसे कहा बसाय ॥ ३८
 अचैतन्य सम वो भयो, जिन न भजो चैतन्य ।
 शरणागत चैतन्य कूँ, वेदहु गवे धन्य ॥ ४०
 गावत श्री गोविन्द गुण, प्रेम विवस सब गात ।
 जिन नहिं देखे गौर हरि, भक्त न समझे जात ॥ ४१
 पंगु न लंघे गिरि शिखर, बीज बिना नहिं अन्न ।
 इमि गौराङ्ग कृपा बिना, भक्ति न पावे अन्य ॥ ४२
 वेद विदित श्री हरी के, भये अगणित अवतार ।
 अवतारी श्री गौर को, जो नहीं जाने रवार ॥ ४३
 लखन मोक्ष कूँ तुच्छ कर, जाकी आनन्द कंद ।
 मायिक जन वा गौर कूँ, मनुज कहत मतिमंद ॥ ४४
 कहो गौर के दास बिन, को पायो श्रुतिसार ।
 हा हा धिक में क्यों भयो, निज जननी के भार ॥ ४५
 गौर हरी के पारषदन, मे लख प्रेम अपार ।
 जान भये हरि पारषद, आपन माह असार ॥ ४६
 अभिय लखन मृदु वचन सो; कर्कस हृदय पखान ।
 तार्किक सब प्रेमी भये, और गौर गत प्राण ॥ ४७
 एकाकी वंचित रह्यो, मे ही मति को मंद ।
 गौर चरण चिन्तामणि, पाय गमाई अंध ॥ ४८
 कहुँ विनय कर वचन में, सुनो सकल महाभाग ।
 सकल छोड़कर करो तुम, गौर चरण अनुराग ॥ ४९
 बैरी इन्द्रिय चक्र में, फसो और कलिकाल ।
 भक्ति मार्ग कैसे मिले, तुम बिन गौर दयाल ॥ ५०
 जनम गमायो वृथा जिन, नहिं देखे चैतन्य ।
 निज सुजनन को संग दे, गौर करो मोय धन्य ॥ ५१

कुमति कुकर्मी वासना, कलुषित कुत्सित चित्त ।
 करो दयामय गौर ने, सहज आपनो भृत्य ॥ ५२
 मो हिय ऊपर भूमि में, भक्ति लता कस होय ।
 धीरज केवल गौर के, नाम गान सो होय ॥ ५३
 मो हिय ऊपर भूमि में, साधन भये सब व्यर्थ ।
 बोए गौर ने प्रेम द्रुम, पल में कियो समर्थ ॥ ५४
 भव जलधि में पड़ो हूँ, नक्र चहत मोय खान ।
 वधो वासना निगड़ सो, गौर बचाओ प्राण ॥ ५५
 दुर्लभ मुक्ति बतावही, शिव सनकादिक व्यास ।
 गौर कृपामय देत सोइ, कर अपनो निज दास ॥ ५६
 कहा निरंकुस कृपा वो, कहाँ वैभव की खान ।
 दीन बंधुता गौर सम, मे नहिं देखी आन ॥ ५७
 सचराचर या जगत कूँ, करत कृष्ण को दास ।
 निगम गूढ़ वो गौर हरि, पूजो मेरी आस ॥ ५८
 शाल्मी जन जो कुछ कहे, मेरे जीवन प्राण ।
 गौर हरी के प्रेममय, सुन्दर नाना नाम ॥ ५९
 सुर दुर्लभ वो प्रेम रस, चाखन चाहो नित्य ।
 योग यग्य तप छोड़ के, करो गौर पद कृत्य ॥ ६०
 सहज चौर वा गौर की, गई न अबहू बान ।
 निष्ठा लज्जा धर्म अरु, हरो हमारो मान ॥ ६१
 दानी प्रेमानन्द को, दिव्य कनक सम अंग ।
 वंदू कल्पक तरु सम, ताके में पद द्वंद ॥ ६२
 धाम धाम में नाम को, तबही भयो प्रकाश ।
 वेद विदित गौराङ्ग को, जबहि भयो अवतार ॥ ६३
 सिद्धी सिद्धन सो मिले, सुर तरु पूरे काम ।
 मन मेरो गौराङ्ग विन, और करत नहिं ठाम ॥ ६४

गौर विमुख जन संग सो, भलो अग्नि को वास ।
 गौर चरण की छटा बिन, पद न भलो श्री वास ॥ ६५
 होउ ईस के दास वो, जो पुरुषारथ दास ।
 गुप्त धाम के काम में, भयो गौर को दास ॥ ६६
 मौर गुणार्व भक्त जन, जीवन आनन्द कन्द ।
 होंगे प्राण प्रयाण कब, लेत नाम चैतन्य ॥ ६७
 कपट छोड़ कब होउगो, कनक गौर को दास ।
 कब होगो मौ हृदय में, राधा भाव प्रकाश ॥ ६८
 गौर धाम सुखधाम में, अविरल करती नाम ।
 करुणा कर मौ हृदय में, करो सदा विश्राम ॥ ६९
 जगन्नाथ मुख कमल लख, भये मधुप चख जासु ।
 हेर हमारौ हरो मन, शरण गहो मन तासु ॥ ७०
 नयन न सीचत प्रेम पय, कण मुक्ता पय दाम ।
 मेरी भव बाधा हरण, शरण हेममय धाम ॥ ७१
 सखा देख संध्या भ्रमे, विद्युत चमकित चंद ।
 लखऊगो उमगो हृदय, वारिध प्रेमानन्द ॥ ७२
 अमृत स्पंदी एक रस, करत अंधतम नास ।
 गौरचन्द्र नख चन्द्रिका, अद्भुत करत प्रकाश ॥ ७३
 क्षणिक तप शीतल क्षणिक, क्षणिक पीन ओर कीन ।
 गौर हरी कूँ निरख तू, नाना भाव नवीन ॥ ७४
 निज पर पात्रा पात्र को, हरि को नहीं विचार ।
 देत नाम के गान सो, प्रेम भक्ति श्रुतिसार ॥ ७५
 तारे स्वपचाधम कुटिल, पापी दुर्घेवहार ।
 पावन पतित स्वनाम की, महिमा राख अपार ॥ ७६
 तज यमुना वृन्दाविपिन, पीत वसन घनश्याम ।
 अरुण वसन अम्बुधि पुलिन, लखो हेम सम धाम ॥ ७७

शिव विरंच इन्द्रादि सुर, विस्मय करत अपार ।
 बिन साधन हरि भक्ति क्यों, गौर करत परचार ॥ ७८
 तप कनक कमनीय तनु, अरुण वसन परिधान ।
 नथनन सौचत प्रेम जल, कर मन ताको ध्यान ॥ ७९
 जाकी आशा कर करो, कृष्ण नाम आधार ।
 श्री चैतन्य कृपा बिन, सो न मिले श्रुति सार ॥ ८०
 साहस सो क्यों करत है, जप तप साधन ध्यान ।
 सुर दुर्लभ वो प्रेम हरि, करत अयाचित दान ॥ ८१
 जप तप अर्चन सिद्धि सब, फीको योगाभ्यास ।
 कहो गौर की कृपा बिन, काकूं प्रेम प्रकास ॥ ८२
 तीर्थाटन षट शास्त्र के, रटनहुँ में श्रम जान ।
 सुलभ प्रेमदात गौर के, चरण शरण मन आन ॥ ८३
 जैसे जैसे गौर पद, पावे कर सद्भक्ति ।
 ताकूं तैसे ही मिलै, राधा पद की भक्ति ॥ ८४
 विधि सुरेश सेवित सदा, चरण प्रेमरस खान ।
 तप कनक सम गौर के, करो नाम को गान ॥ ८५
 सत्य सत्य मैं कहत हूँ, विनय सुनो दे कान ।
 छोड सकल गौराङ्ग को, भजो होय कल्याण ॥ ८६
 भक्ति मुक्ति दुर्लभ नहीं, मैं जानी मन माह ।
 गौर कृपा दुलभ लखी, बैकुंठहुं के माह ॥ ८७
 प्रेम भक्ति से पूर्ण है, भजो चरण चैतन्य ।
 आनन्द से या जगत कूं, करो गौरमय धन्य ॥ ८८
 भजन प्रणाली प्रेममय, भक्ती और अनुराग ।
 गौर दास के गुण प्रकट, क्षमा दया वैराग्य ॥ ८९
 कीर्तन बिन कालि संतरण, कहा कौन विधि होय ।
 प्रेमामृत या गौर बिन, दाता लखो न कोय ॥ ९०

जाकूं ताकूं जहाँ तहाँ, मिले ज्ञान वैराग्य ।
 गौर चरण की भक्ति जिन, लहीवोही सद् भाग्य ॥ ६१
 गावो तुम सब प्रेम से, नाम गौर के नित्य ।
 ब्रह्मन्द्रादिक देव सब, करत जासु पद कृत्य ॥ ६२
 कवहुँ नहीं गौराङ्ग बिन, करे और की आस ।
 पाय चरण चिन्तामणि, पूरे सब की आस ॥ ६३
 अहंवाद अध्यात्म ने, वादन मोहो चित्त ।
 जो सुख सों भक्ति चहो, होउ गौर के भूत्य ॥ ६४
 कटि पट कुँडल श्रवण बिच, कंकण हिय हार ।
 गौर मस्तिका मुकुट धर, नाचत नाम उचार ॥ ६५
 मैं जानी गोपाल ही, भये कनकमय धाम ।
 लीला राधारमण की, और प्रचारण नाम ॥ ६६
 दास्य सख्य वात्सल्य ओर, कृत गोपिन को प्रेम ।
 दियो दयामय कृष्ण ने, धार रूप सम हेम ॥ ६७
 लख नाना मुनि मतन कूं, भ्रमित भयो संसार ।
 गौर चन्द्र लख सकल जग, प्रेमी भयो इकसार ॥ ६८
 पङ्गु न लंघे गिरि शिखर, बीज बिना नहिं अन्न ।
 इमि गौराङ्ग कृपा बिन, भक्ति न पावे अन्य ॥ ६९
 असुअन सीचत सरस हिय, स्वास लेत गंभीर ।
 हरो गौर ब्रज विरहणी, भावुक मेरी पीर ॥ १००

श्री गोस्वामिकृष्णचरण (कृष्णकवि) विरचित
 श्री चैतन्यचन्द्रमृतकणिका समाप्ता

श्री श्री गुरबे नमः

रासपंचाध्यायी भाषा

तस्मै श्री गुरु चरन नमौं जो ज्ञान अंजन नेत्र हि देयी ।
अज्ञान अंधतम प्रकाश हि परम परतत्व दरशायी ॥१
बंदौं श्री कृष्णचैतन्य-नित्यानंद द्वौं जगत कृपालु होई ।
गौड़ उदयाचल एक समै दोउचंद्र सूर्य जैसे उदिताई ॥
सकल जन हृदै अज्ञान तम त्रिविध ताप सब नासहि ।
परम मंगल मुखद भक्ति सदृश पुस्पाकर विस्तारहि ॥२
न अर्पित कहुँ स्वभक्ति उज्वल रस समर्पहेतु सो वपु धरि ।
कांचन कांति सुन्दर दीसित कलौ करुणा अबतीर्ण करि ॥
सो शचीनंदन हरि सिंह हूँ प्रवल हुँकार दर्प भरि ।
वसै सदा हृदि कंदरा तुमरे सो कलमप द्विरद नाश करि ॥३

राधाकृष्णप्रणय इत्यादि—

कृष्ण प्रेम स्वरूपिनी राधा ल्हादिनी शक्ति इत एक आत्महि ।
पूर्व ब्रजपुर दोउ देह भाँति करि रास रस बिलसहि ।
सो दोउ अब एकत्र मिलि श्री चैतन्य नाम प्रकट होहि ।
राधा भाव कांति अंगि करि सोभा नौमि कृष्णस्वरूप सोहि ॥४

श्री राधाया: प्रणय इत्यादि —

श्री राधा प्रेम कि प्रबल महिमा कीदृश इह जानि ना पाई ।
ता में हमारो अतुल मधुरिमा सो राधा कीदृश आस्वादई ।
राधा सुख अनुभव कीदृश इत लोभि तद्भाव युक्त होई
शचीर्गर्भ सिंधु पूर्णचंद्र हरि ऊदीत भुवन प्रकासहई ॥
अज्ञान मत्त जन दोष नाश हि कृपा हुँ ते जो प्रमत्त करि
स्वप्रेम सुधा सम्पत्ति दाता श्रीकृष्ण चैतन्य प्रपद्य हमारि ॥६

श्री अद्वैत नित्यानन्द अंग दोउ पार्षद भक्त बृंद संगहि ।
 प्रेम नाम संकीर्तन प्रकाशि बंदौं जगत पावन दयालुहि ॥
 बंदौं श्रीरूप सनातन भट्ट युग रघुनाथ श्री जीब गोसाई ।
 जो उज्वल प्रेम रस विस्तारि साधन सिद्ध भाव दरशाई ॥
 बृंदावन वासि बैष्णव पद करि दंडवत हुँ माथे धरि ।
 दोष अदर्शि शील निर्मल हुँ इह जानि भरोसा चित्त भारि ॥
 हम दीन अति हीन मंद मति ता में बुद्धि विद्या बल ही नाहि ।
 रास पंचाध्यायि भाषा पद करि गाहृवे कि लोभ मन मईहि ॥
 श्री व्यास नंदन पद नमामिहुँ इह भाषा पद गीत जो गाई हैं ।
 इत दोष दृष्टि होत नाहि जो पूर्व शास्त्र प्रसंग मन लाई हैं ।
 कृष्ण रास रस पद गीत गाई चिरोंद्रिय मन हर्षहु पाई हैं ।
 पान करि हृदि तृप्त ना मानि फेरि तृष्णा ध्रवन उपजाई हैं ॥

श्रीभागवते-विक्रीडितं व जवधूभिरित्यादि—

ब्रजबधू सह रासलीला किन्ह जो नंदनंदन हि ।
 अद्वायुक्त होइ सुनत जोइ अथवा इह कोइ वर्णतहि ॥
 श्रीकृष्ण की यह श्रेष्ठ भक्ति निश्चय ताकौ मीलहिं ।
 हृदि काम रोगहि नास जात है सर्व ज्ञाता तत्व कि होहि ॥

निगमकल्पतरु इत्यादि—

बेद कल्पतरु सहस्र शाखा ता में एक फल श्रीभागवत हि ।
 सुक मुख तें जब सखलथ होई अमृत निंद परामृत सोहि ॥
 रसआलय रस कि पूरह समूह रस कि स्वरूप हि ।
 हे रसिका द्रवी भावुका सब पान करो वारम्बार हि ॥

श्रीभागवत द्वादश स्कंधहु द्वादश अंग मानि कृष्ण रूपहिं ।
 ता में पंचाध्यायी पाठ आत्म हुँ जाकि महिमा वरनि न जाहिं ॥
 श्लोक संख्या इह अंकित किनि पद गीत संख्या तामें दिनि नाहि ।
 पंचाध्यायि भाषा पद जो गाइ क्रम करि और लिखहु ताहि ॥

इति गुर्वार्दि स्तुति पद बंदनम् ॥

अथ ग्रन्थारम्भः

भगवानपि ता रात्री इत्यादि—

भगवान श्री नंदनंदन हरि इह योगमायाश्रय करि ।

इत लीला प्रेम हि रूप माधुरि सो मधुर वेनु कर धरि ।

ता राति शरद कि फूलि फूलन समीर सुगंध वहे लहरि ।

सरस कृतु देखि अनुसृत सो रास अभिज्ञाष मन करि ॥१

तदोद्गुराज इत्यादि—

ता समै चंद्र अरुण किरन पूरव दीशते झलकारी ।

जैसे प्यारो प्रिया चिर दर्शन सुखद प्रानि दुःख जात हरि ॥२

दृष्टवा कुमुदन्त इत्यादि—

पूर्ण चंद्र रमा सुख आभा नब कुंकुमारुण रंजित करि ।

देख बन याहि भाँति गीत गाइ ब्रज जुवतिन को मन हरि ॥३

निशम्य गीतं इत्यादि—

सुनत गीत ताई जागि अनंग कृष्ण रूप मनहि में लाई ।

कुंडल लोल बेग चलन-तेसो जहाँ कांत अलक्ष चलि आई ॥४

दुहन्त्योऽपि यथु इत्यादि—

कोइ गोपी दूहत दोहनी पटकाई । कोइ गोपी चुले पै पथ औटाई ॥

कोइ गोपी संजाव रशोई रसाई । ताहि सब छोड़ एहु चलि आई ॥

परिवेशयन्त्य इत्यादि—

कोइ गोपी परिवेशन हु विसराई । कोइ गोपी बालकहुँ न दूध पिअराई ॥

कोइ गोपी पति सेबन ते भूलि आई । कोइ गोपी भोजन तजि उठि धाई ॥

कोइ गोपी मांजत अंग उवटाई । कोइ गोपी अंजन एक नैन अंजाई ॥

कोइ व्यतस्ताम्बर आभरन आई । नक बेसर एक कान सोहाई ॥

कोइ गोपी कटि कीकंणि हार पहिर आई । एहु सब कृष्णनिकट मिली जाई

ता वायर्यमाणा इत्यादि—

पति पित्रि भाइ वंधु समझाये । वरजि राखे कोइ वरजि ना पाये ॥

ऐसे गोविंद चित्त मोहि ताहि । सुध बुद्धि तन हि कि मन हर लाहि॥७
अन्तगृहगता इत्यादि—

कोइ कोइ गोपी जान न पाई । सुनत ही गीत चित्त बिकलाई ॥
अन्तः पुर गत गमन रहि ताहि । कृष्ण भावना करि दृष्टि लगाहि॥८
दुःसहप्रेष्ठविरह इत्यादि—

कृष्ण विरहज ताप सहन न पाई । ता में अशुभ अमंगल हि कटाई ॥
कृष्ण ध्यान तें जब आलिंगन पाई । ता में शुभ मंगल सब कटि जाई ॥९
तमेव परमात्मानं इत्यादि—

छंद—सोहि परमात्मा जार बुद्धि करि जैसे परमागति पाइहि ।

गुणमयि देह जब छोड़ दीनि तबहि गुणवंध छोडाइहि ॥१०
कृष्ण विदुः परं कान्तमित्यादि—

कृष्ण को जानि कांत पर पति ब्रह्म ऐसे ज्ञान मनहु न लाई ।

गुण बुद्धि ते गुण देहापभाव कहो सुकदेवजि कैसे छोड़ाई ॥११

उक्तं पुरस्तात् इत्यादि—

पूर्वं प्रसंग सुन हो परक्षीत इह वरनी । जो तुमहि सुनाई ।

शिशुपाल द्वे विसिद्ध गति पाइ प्रिय भावते क्या संदेह मन लाई ॥

नृणां निःश्रेय इत्यादि—

इह नृलोक कि हित कारन कृष्ण आपनि प्रकट देखाई ।

सो अविनासो अपरिमान हु निर्गुण सगुण किनि नियन्ताई ॥१३

कामं क्रोधमित्यादि—

काम क्रोध भय प्रेम सम्बंधहि सुहृदता इह जगताहि ।

इतने जो नित्य हरिते राखे सो हरि ताको निज गति देहि ॥१४

न चैवं विस्मय इत्यादि—

सो भगवत्य अजनि मानुख ताकि कारज संदेह मत लाई ।

जो हि योगेस्वरेश्वर कृष्ण है सब को जो मुक्त पद दाई ॥१५

ता दृष्ट्वान्तिकमायाता इत्यादि—

देखे भगवान् ब्रजसुन्दरीगन ऐसे निकट चलि आये ।

बोलन लागे मधुर बोलन प्रिय बचन हीते मोहाये ॥१६
स्वागतं वो महाभागेत्यादि—

आपनि आयि हो सुन्दरीगन हमते क्या प्रीत वनि आई ।

ब्रज कि कुशल आगमन कारन कहोरि सब मोय सुनाई ॥१७
रजन्येषा घोररूपा इत्यादि—

यह निसा अति घोर रूपा निसाचर डर जानिहि ताई ।

इह बन स्त्रिया रहे न कोई किरि जाओ तुमहि ब्रज माई ॥१८
मातरः पितर इत्यादि—

मात पित सुत भ्रात निज पति छूट फिरत बिकलाई ।

तुम्हें न देखि वे दुःख पाये देओ सुख तुम उनहिं को जाई ॥१९
दृष्ट बनमित्यादि—

देखे बन बन फूलहि फूलन चन्द्र किरन उजरे रथे ।

पर्श जमुनानिल मन्द वहै कंप तरु शाखा सोभा अति शये ॥२०
तद्यात माचिरं इत्यादि—

बेगि जाओ सब अपने घर को पति सेब हो सति मन लाये ।

रोदित सब बत्स बालक दोहायो पियायो उनहि को जाये ॥२१
अथवा मदभि इत्यादि—

तुम हि जो हमारे प्रीतहि कारन होय हो आसक्त चित्ताशय ।

आये निकट युक्त इह मानि ऐसे सब जन प्रोत करे हय ॥२२
भक्तुः शुश्रुषणं स्त्रीणामित्यादि—

पति सेबन पर धर्म त्रिया की । कपट रहित मन होई जाकी ॥

पति बंधु सेबन युक्त होय । यह प्रजानुपालन गुन सोय ॥

कठिन स्वभाव कुश्रिय दीना । बृद्ध जड़ रोगि होइ धन हीना ॥

ऐसे पति त्रिया छोडे नाहि । कहैं अपातकि सब जग ताहि ॥२३

अस्वर्यमवयश्यमित्यादि—

लोक में निंदित जानी ताई । जोहि स्थिया कुल उप पति गाई ॥

अपरलोक अपयश सोयाहि । दुःखहु भयावह होत है ताहि ॥

अवणादर्शनादित्यादि—

अवण दर्शन ध्यानपरा होय । मेरि कीर्त्तन प्रेम उपजोय ॥

निकट मेरि ऐसे प्रेम न होय । केरि जाओ तुम सब गृह कोय ॥

अप्रिय भाष गोविंद सुनाये । इत ब्रजनारि सकल अकुलाये ॥

आशाभंग हि विसर्ण चित्त माँहि । द्वृष्टि गर्याँ चिंता सागर थाहि ॥

कृत्वा मुखान्यवशुचः इत्यादि—

कृष्ण आगे ठाड़ी ब्रजनारी । ऐसे परि गहीर दुःख भारी ॥

अब मुख कीनि स्वास निस्वासा । विंब अधर ही सूखत त्रासा ॥

पइ अंगुलि ते भूम लिख तायि । अश्रु वारि कुच कुच कुम धोइ जायि ॥

प्रेष्टं प्रियेतरमित्यादि—

प्रिय अप्रिय इतर भाषमाना । कृष्णार्थ निवर्त्ति गई सब कामा ॥

नेत्र विमृद्धि हि रोदित विखरि । रुद्ध गोर कंठ कूप करि थोरि ॥

मैवं विभोरित्यादि—

कृष्ण जो बोले कठोर ऐसि वानी इह अति अयोग्य तिहारि ।

तजि विषय तुव पद मूल भक्त्या भजे हु सब कुलनारी ॥

हम हुँ भजते भजति सुन्दर इह परम्परा विध मानि ।

उत आदि देव नारायन जैसे भजे हु मुमुक्षु जन जानि ॥२८

यत्पत्यपत्य इत्यादि—

पति सेवन पर धर्म हि स्थिया कि इह जो तुम उपदेस कारी ।

यह उपदेस तुमहि ते वत्ते प्रिय आत्म बंधु सकल तनु धारी ॥२९

कुव्वन्ति हि त्वयि रतिमित्यादि—

तुम तें रति करै पंडित जन इह नित्य आत्म प्रिय भाव करि ।

पति सुतादिक सदा दुःखदायि शास्त्रविद इह कहानी विचारि ॥

तुमहि प्रसन्न हो बरदेस्वर हे पद्मनेत्र तुम नाथ हमरि ।

बहुदिन आशाधारि हम जन कि आशा भंग अवहु मत करि ॥३०
चित्तं सुखेन इत्यादि-

तुमहिं हमारे चित्तहु हरिलाये सुखते गृह प्रवेश रहिरी ।

पद ना चलत तुम पद मूल तें कहो ब्रजहि जाइ काहा करी ॥३१
सिङ्गाङ्ग नस्त्वदधरेत्यादि-

निज अधरामृत करहु सेचन हाँसीक्षन गीत कामागिन जरि ।

नहि बिरहजागिन देहा करि दाहा ध्यान ते जात निकट तुमरि ॥३२
जर्हयम्हुजात्त इत्यादि-

हे पद्मनेत्र तव पद तल लचमी दत्तात्रेन अरन्यजन प्रियाहि ।

सुन्दर सो पद प्रवृत रमित दुऊ समीप ठाडे शक्ति नाहि ॥३३
श्रीर्यष्टपदाम्बुजरज इत्यादि-

जो पद रज लचमी करि आसा । सौतायि करि चाहे संग तुलस्या ॥
बक्षसि पदवी जानि इह तायि । जो पद दास सेवत नित्य तायि ॥
जा सोभा देखि ब्रह्मादि तप लेहि । सोहि पद रज हमहु को देहि ॥३४
तत्रः प्रसीद इत्यादि-

प्रसन्न होहु दुःखनाशन हारो । अब पाइयो पद मूल तुमारो ॥

जा कि आश ते वसति त्यज देह । करि उपासना तन मन लेह ॥

सुन्दर हास हि निराखि तुमार । काम तापते तपति सब नारी ॥

हे पुरुष रतन तुम हित कारि । अब देह दासि पद हुं तुमारि ॥३५
चीच्यालकावृतमुखमित्यादि-

अलकावृत मुख कुँडल सोभा । गंडस्थलाधर सुधा हास लोभा ॥

अभय दत्त भुजदंड तिहारि । रति जनक वक्षः सोभा नेहारि ॥

इह देखि हास सब कुल नारि । आह दासो भई हों तुमारि ॥३६
कास्त्रयग ते इत्यादि-

कल पदामृत गीत मन मोहि । इह त्रिया पति धर्म न छोड़े काहि ॥

त्रिलोक की शोभा तव रूप हेरी । गो पक्षि सृग द्रुम पुलक घनेरी ॥

ध्यक्त भवान् इत्यादि—

ब्रज दुःख नाशन ध्यक्त तुमारि । आदिदेव जैसे सुरलोक रखारि ॥

तुम आत्मवंधु किंकरी जन कि । कर पद्म धर सिर तापिस्तनकि ॥

इति विकलचित्तित्यादि (छन्द)

एतहि बिलपि सब गोप सुन्दरी सुनि जोगेस्वर हरि ।

हास बदन ते सो गोपीन सह आत्मराम हो रमन करि ॥३६
ताभिः समेताभिरित्यादि—

ता गोपीयन सह सुन्दरचेष्टित कृष्णेन्हित फुल बदन होइ ।

सुन्दर हास दशन कुन्द सोभा तारा माख चन्द्र विराज सोइ ॥४०

उपगीयमान इत्यादि—

सुन्दर गीत मधुर सुरते शत यूथ वनिता सह गाइ ।

वैजन्ती माला सोभमाना बिहरत बन सोभा होत ताइ ॥११

नद्या: पुलिनमित्यादि—

गोपीयन सह पुलिन बन आये जहाँ सुन्दर हिमबालुहि ।

जमुना कर तरंग सेवित कुमुदामोद बायु बहतहि ॥४२

बाहुप्रसारेत्यादि—

बाहु प्रसार करि आलिंगन कर उरु परस्परा होइ ।

निवी स्तन पर्श नम्म रहस्य ते नखाग्रपात करत सोहि ॥

क्रीड़ावलोकन हास मुसकानि ब्रजसुन्दरी गन हसावतहि ।

रति पति काम करि उद्दीपन ता सुन्दरी सह रमतहि ॥४३

एवं भगवत कृष्ण इत्यादि—

सो भगवत कृष्ण महात्मन गोपसुन्दरी लब्धमान होई ।

इह जगत स्त्रीयन मध्य अपने अधिक करि मानतोई ॥४४
तासां तदित्यादि—

ता सब की सौभगमद मान गर्व कृष्ण निज दृष्टि हु ठरि ।

सो मदनाशन प्रसन्नमान कि अलक्ष हु अंतद्वयान करि ॥४५

इति रासे प्रथमोऽध्यायः ।

अन्तर्हिते इत्यादि—

कृष्ण अचांचक अन्तर्धान जातहि कोइ काहु लक्ष्मन न पाई ।

ताकि अदर्शन वितापि गोपिन जैसे करिणी कर छोड जाई ॥१

गत्यानुराग इत्यादि—

गति अनुराग हास ईक्षन सनोरमा आलाप विहारहि ।

आक्षिसचित्ता गोपबधू सब कृष्ण चेष्टा करि तदात्मिकहि ॥२

गतिमित इत्यादि—

गमन हासीक्षण बोलन प्रिय प्रिया प्रति मूर्त्त आरोढाई ।

कृष्ण अहं इति निवेदि विहार बिलास कर तदात्मिकाई ॥३
सायन्त्र्य उच्चैरित्यादि—द्वीपादि

मिल गोपबधू कृष्ण गुन गाई । मृत्तकसि फिरे सकल बन माहि ॥

आकाश एसो गुन पुरुष जानि ताहि । सब वृक्षलता बन पूछत जाहि ॥

दृष्टो वः इत्यादि—

हे अस्वत्थ प्लक्ष नग्रध तुमहि । नन्द नन्दन की कहुँ दृष्टि परहि ॥

प्रेम हास अबलोकन ते सोहि । हम सब कि मन हरि ले जोहि ॥५

कश्चित्तुलसि इत्यादि—

हे तुलसि मंगल रूप तुमारि । गोविंद चरन कि परम प्यारि ॥

तुम सह अलिकुल सोभनहारो । कँहि देखे कृष्णहु प्यारो तुयारो ॥६

कच्चित् कुरुवक इत्यादि—

हे कुरुवकाशोक नाग पुन्नागा । हे चंपका कृष्ण कहुँ दृष्टि लागा ॥

रामानुज कृष्ण हम मानिन हि । गयो सुहासते दर्प हरि लहि ॥७

चूतप्रियाल इत्यादि—कृन्द

हे चूत प्रियाल पनसा हे सन कोविदार महानुरूपा ।

हे जम्बर्क हे बिल्व हे बकुलाम्र कदम्ब-नीपा ॥

जमुना कुल जन्म तेहारो तीर्थवासि पर उपकारी ।

कृष्ण पदबी कहि सुनायो आत्मरहिता हम सब नारी ॥८

मालत्यदर्शि वः इत्यादि —

हे मालति जाति जुति मल्लिकाई । कृष्ण तुम सब निकट दर्शाई ॥
कर पर्शि कृष्ण निज सुख पाई । गवो तुम सब की प्रीति बढ़ाई ॥८
किं ते कृतं क्षिति इत्यादि—

हे क्षिति तुम क्या तप किनी कृष्ण पद पर्शिहर्ष रोम पुलकाई ।
क्या न्रिविक्रम पद मिलन तें क्या बराह बपु आलिंगन पाई ॥९०

अप्येणपत्न्युपगत इत्यादि—

हे सखि हरिनी कृष्ण प्रियासह इते गयो तुमहि सुख देह ।
प्रियांग संग कुच कुंकुम रंजित कुंदमालहि गंध बायु लेइ ॥९१
बाहुं प्रियांस इत्यादि—

बाहुं प्रियास्कंध लीला पद्मकर तुलसिका अलिकुल धायि ।
हे तरु तुव प्रनाय कृष्ण क्या अबधानै प्रनयावलोकनायि ॥९२

पृच्छतेमालता इत्यादि—

देख पूछत लता बनस्पति आलिंगन करि इत सोभा पाई ।
साचो मानि कृष्णकर पर्शि ऐसे उत्कुल पुलक भाव लाई ॥९३

इत्युन्मत्तबचो इत्यादि—

ऐसे उन्मत्त बोलि सब गोपिन कृष्ण अन्वेसन कातर होइ ।
कृष्ण लीला करि परस्पर कृष्णानुरूप हो तदात्मिका जोइ ॥९४

कस्याश्रित् पूतनायन्त्याः इत्यादि—

कोइ गोपी पूतना बनि आई । कृष्ण बालकसि स्तनहु पियाई ॥१
कोइ गोपी बालक हूँ जैसे रोई । पदघात तें शकट पटकाई ॥१५

देत्यायित्वा जहारा इत्यादि—

कोइ गोपी तृनाबर्त्त बनि आई । ऐसे बालक कृष्ण हरि ले जाई ॥
कोइ जैसे बालक जानु गत धाई । चलतहि पण नूपुर बजाई ॥१६

कृष्ण रामायिते इत्यादि—

कोइ कोइ कृष्ण राम रूप होई । कोइ कोइ गोप ही रूप दिखाई ॥

कोइ कोइ बक बत्स बनि आई । कोइ कृष्णानुरूप हो बधि ताई ॥१७
आहूय इत्यादि—

कोइ कृष्णानुकम बेन बजाई । दूर बन तें सब धेनु बोलाई ॥

ऐसे सुन्दर बेनु तान सुनाई । कोइ साधु साधु बखानत ताई ॥१८
कस्याचित् स्वभुजं इत्यादि—

कोइ गोपी निज भुजा उठाई । कोइ स्कंध धरि यह कह ताई ॥

कृष्ण अहं हि ललित गमनाई । यह देख मेरि हांत मन्हाई ॥१९
आ भैष वात इत्यादि—

इह मेहा वर्षे डर मति कोई । ताकि व्रान मंगलहु विध जोई ॥

एक अंवर धरि हात उठाई । या कहि गोबद्धन लीजा देखाई ॥२०
आरुह्ये का इत्यादि—

कोइ पदकम करि आरुहाहि । कालिमाथै ऐसे नृत्य कर ताहि ॥

हे दुष्ट तुम जाओ हाँ तें न्यारि । सब खलन कि हमहुँ दंडधारि ॥२१
सत्रैक वाच इत्यादि—

तहाँ एक गोपी कहति सुनाई । हे कृष्ण देख दावानल दहताई ॥

कृष्ण बोले रहो सब नेत्र छिपोई । इतहि तुम मंगल विध होई ॥२२
घदान्यया स्त्रजा इत्यादि—

कोइ यशोदा रूपहु बनि आई । कृष्णसि बालक पाकर कर लाई ।

खज बांधि उलूखल लाई । भांड फोरि माखन कि चोराई ॥

जो हि सुन्दर नैन छिपाय । रहत हि ऐसे मन डर पाय ॥२३

एवं कृष्णं पृच्छसाना इत्यादि—छन्द

ब्रजसुन्दरी दुः फेरत वृक्षलता बन कृष्ण पूछन हारि ।

कृष्ण पद चिन्ह भूमांकित ताहि सकल गोपीन दृष्टि नेहारि ॥२४
पदानि व्यक्तमित्यादि—

व्यक्त जानि इत पद चिन्हहि माहात्मन नंद नंदन हरि ।

देखत ताहि ध्वज पद वज्रांकुश जवादि रेखा सब न्यारि ॥२५

तैस्तैः पदैरित्यादि—

ताहि पद चिन्ह जानि लक्ष्यत हि कृष्णमारग द्वादश हारि ।

एक बधू पद चिन्ह मिलित देखो दुःख मानि कहि फुकारि ॥२६
कस्याः पदानि इत्यादि—

किनकि पद चिन्ह इतहि देखो कृष्ण संग मिल गई तायि ।

सुन्दर भुजहि स्कंध आरोपि जैसे करिन्य कर मिल जाई ॥२७
अनया राघितो इत्यादि—

सो बधू-आराधित निश्चित इह भगवान योगेश्वर हरि ।

या कि प्रीति ते हम त्यजि गोविंद निजेन लाये विहार करि ॥२८
धन्या अहो इत्यादि—

धन्य हे सखी गोविंद पद रज याकि महिमा भारी ।

जो रज ब्रह्मा शम्भू रमादेवो पवित्र होय मस्तक धारि । २९
तस्या अमूलि इत्यादि—

सो बधू पद चिन्ह हु देखत इत में ज्ञोभ मन हौत हमरि ।

कृष्ण अधरामृत गोपीयन धन एकलि लाई संभोग करि ॥३०
न लक्ष्यन्ते इत्यादि—

ताकि पद चिन्ह तहाँ नहिं देखि तुर्णांकुर बन शोच बिचारि ।

कोमल पद तल ज्ञत भय मानि प्यारो प्यारि लिन स्कंध परि ॥३१
इमान्यधिकमग्नानि इत्यादि—

देख अधिक मग्न पदांकित इह हेतु एक मानि ब्रजनारो ।

बहत बधू भाराकांत कृष्ण ईह कामुक अनुमान बिचारी ॥३२
अत्रावरोपिता कान्ता इत्यादि—

सो महात्मन पुष्पहि कारन आब प्यारि को इतहि उतारि ।

कुसुम तोड़ि पदाक्रम करि असकल पद चिन्ह नेहारि ॥३३

केशप्रसाधन इत्यादि—

कामिन्या कामिन बेश बनाई आवहि केश संस्कार करी ।

सौ पुष्प चूड़ा वाँधि सुन्दर इत बैठे संग लिये प्यारी ॥३४
ऐमे तया इत्यादि-

आत्माराम स्वात्मरत हौर्झ सौ प्यारी सह अखंड रमे तार्झ ।

इत कामियन कि दैन्य इत रता स्त्रीया दुरात्मता दरशार्झ ॥३५

इत्येवं दर्शयन्त्य इत्यादि—द्वीर्पदि

ब्रजनारि फिरति बन भटकै । खौर निकट बन ताहि को देखै ॥

जाको कृष्ण निर्जन हु बन लाये । जाको लागि सोहि सब त्यजि आये॥
सा च मेने इत्यादि—

सो गोपी निज मनहि अभिमानि । सब स्त्रीया में आपनि श्रेष्ठ जानि॥
सब अनुरागि गोपीन त्यजि देव्ह । कृष्ण भजै मोहि प्रीति लगार्झ ॥३७

ततो गत्वा इत्यादि—

देखि बन देशहु कृष्ण तैं बोली । चलहुँ न पाँड सुन बन डोलो ॥

जहाँ आबहि तियारो मन भाओ थे । तहाँ तुम लेई चल अब मोये॥

एवमुक्त इत्यादि—

कृष्ण बोले प्यारि तुम आओ । निज स्कंधोपर तुम आरोढायो ॥

क्रमते करत स्कंध आरोढ़ोर्झ । ताहि कृष्ण अन्तरध्यानहु होर्झ ॥

सो वधू ताप विरह दुःख पाही । ऐसे फेरति एकेलि बन माही ॥३९

हा नाथ रमण इत्यादि—

हा नाथ रमन प्यारो तुम मेरि । कहाँ गये हो एकेलि बन फेरि ॥

हम निज दासी जानि वेहारि । दर्शन देओ निकट विहारि ॥४०
अन्तिवच्छ्रुन्त्यो इत्यादि—

द्वृत सब गोपी ताहिको देखे । बिरह दुःख तैं रहि बिमोहके ॥४१

तथा कथित इत्यादि—

सो गोविंद तैं मानहु जैसे पार्झ । ता सबहि को कहिकै सुनार्झ ॥

फिर आपनि अबमानि जो होर्झ । सुनि ता सब बिसमय चित्तलार्झ ॥४२

सतोऽविशन् वनं इत्यादि—

ताहि संग ले दूढ़त सब नारि । जब ते रहि चंद्र कि उजियारि ।
तहाँ एक अंधियारि ऐसे बेरि । निवर्त्ति रहे सकल गोप नारी ॥४३

तन्मनस्का इत्यादि—

कृष्ण मनोलाप कृष्ण गुन गाई । सब निज देह गेह बिसराई ॥४४
पुनः पुलिनमागत्येत्यादि—

सब फिरहि पुलिन बन आये । कृष्ण आगमन कि वासना मन लाये ॥
मिज बैठे सकल एक ताई । कृष्ण महिमा गुन मधुर करि गाई ॥४५
इति रासे द्वितीयोऽध्यायः

अथ गोपीगीत—

जयति तेऽधिकं इत्यादि—छन्द-

जब ते तियारि जन्म इह ब्रज जयति मंगल अधिकाई ।
लक्ष्मी लंकृत बसत निरन्तर घर धर होत आनन्द बधाई ॥
हे कृष्ण तुम निज दृष्टि ते देखो तियारि जन तुम लागि ।
धरत प्रान फिरत बन वन होइ तुम्हार अनुरागि ॥१

शरदुदाशयेत्यादि—

हे सुरतनाथ नैन तुमारि शरद कमले दल सोभा हरि ।
ताहि अमूलदासिका हनत ईच्छित ते को हानहि वध करि ॥२

विषजलाप्ययात् इत्यादि—

विष जलाप्यय ब्याल रात्स बर्धा माहत दाबारिन बारि ।
बृषासुर मारि विस्व भयते ब्रज जन कि करि रहारि ॥३

न खलु गोपिका इत्यादि—

हे सखे तुम जशोदा नन्दन नहिं देहिनात्मरात्मा दृष्टिकारि ।
क्या ब्रह्मा अर्थित विश्वरक्षित तुमहि यदुकुल प्रकट कारि ॥४

विरचिताभयं इत्यादि—

निज भक्त जन तुम अभय दत्ता तुमहि श्रीकर ग्रहन करि ।

हे कांत कामद कर-सररुह अब देहि हमहुँ सिरोपरि ॥५
ब्रजजनाच्छिन् इत्यादि—

हे वीर ब्रजजन दुःख नाशन योषित जन गर्व हारि ।

दर्शन दे कमल मुख सुन्दर हे सखे हम दासि तियारि ॥६

प्रणतदेहिनामित्यादि—

प्रणत जन कि दुःखहु नाशन धेनु अनुयात पदांबुज तियारि ।

श्री निकेतन फणि-फणापित धरो कुच पै हर ताप हमारि ॥७

मधुरया गिरा इत्यादि—

हे पद्मलोचन मधुर गिरा सुन्दर बचन अति मनहारि ।

अमूल दासिका मोहित जीवन पियायो अधर सुधाहु तियारि ॥८

तब कथासृतं इत्यादि—

तब कथासृत तापिज्जन जीवन कविहि बंदित दुःख नाशन होहि ।

सुनत मंगल श्रीमत् दिस्तारि जगत पै श्रेष्ठ दाता जन सोहि ॥९

प्रहसितं इत्यादि—

सुन्दर हाँसि प्रेमेन्द्रण विहार हि तब ध्यान मंगलहु हमारि ।

निर्जन मंकेत जो हृदै स्पृहा क्षोभि मन जानि कुहक तियारि ॥१०

चलसि यद्वजादीत्यादि—

गौचरायन जायो ब्रज तें हे नाथ लक्षित पदहु तियारि ।

सिलदृणांकुर दुःखद जानि हमहु मन दुख होत भारि ॥११

दिनपरिक्षये इत्यादि-द्वीपदि

दिन अबसान केरि जब आयो । सब गोधन हि संग करि लायो ।

कुन्तलावृत कमल मुख सोभा । गोरज परान जैसे अक्षि लोभा ॥

सुन्दर रूप सोभा दरशायि । हेरि स्मर वश सब मन मायि ॥१२

प्रणतकामदमित्यादि—

हे रमन चरन कमल तियारि । प्रणत जन आशा पूरन कारी ॥
जाको ब्रह्मा पूजत नित्यताई । वेद वखानत अन्त न पाई ॥
धर भूषन धै विपदा नाशि । सेवित जन वहु सुखहुँ ददासि ॥
हे दुख नाशन चरन तियारो । सो अब अर्प हो स्तनहुँ हमारो ॥ १३
सुरतबद्धनं इत्यादि—

हे वीर ! तुम अधरामृतरासि । अब बितरहु हमहु पिवासि ॥
सुरत बद्धि चुम्बित वेनु संशि । इतर राग नृलाक दुःख नाशि ॥ १४
अटति इत्यादि—

तुम जाओ वन दिन प्रति जानि । ज्ञण नहिं देखि युग करि मानि ॥
कुटिल कुन्तलावृत मुख सोभा । दर्शिष्टश-निमिष कृत जड खोभा ॥ १५
पतिसुता इत्यादि—

पति सुत वंधु भया सब छोड़ि । अब आयि हम निकट तब जोरि ।
तुम गीतते मोहिता सबनारो । तुमहिं अब गतिविद हमारी ॥
हे कितव निजयोषित निशि आइ । तुम विनु को पुरुष त्यजि ताइ॥ १६

रहसि संविदं इत्यादि—

प्रेम ईक्षण सुन्दर मुख हैंसि । उर वर सोभा धाम यों दर्शि ॥
निर्जन संकेत कामोदय तियारि । रति स्पृहा हो मन मोहे हमारि ॥ १७
ब्रजबनौकसां इत्यादि—

हे विश्वमंगल व्यक्त तियारो । ब्रज जन कि दुःख नाशन हारो ॥
हम ज्ञण मति त्यज हे प्रियात्मन् । तुम स्वजन हृदय रुजनाशन ॥ १८
यत्ते सुजात इत्यादि—

हे कृष्ण कोमल पदावज तियारो । कुच युग होत कठिन हमारो ॥
धारहुँ एतहि भय मन मानि । चरत बन दुख होत अनुमानि ॥
कृष्ण तुमहुँ प्रान हम सब के । ता में बुद्धि मोह होतहि मन के ॥ १९

इति रासे तृतीयोऽध्यायः

६८४

इति गोप्यः प्रगायन्त्य इत्यादि-छन्द

गाय प्रलयि सुन हो राजन् ऐसे हि सकल गोप नारी ।

उच्चि सुर मिलाइ रोइ कृष्ण दर्शन लालसा मन भारी ॥१
तामामाविरभूच्छ्रौरि इत्यादि-

ता गोपीयन माझ आये सुन्दर पद्ममुख हास मान करि ।

पीताम्बर धर माला सोभित साक्षात मन्मथ दर्प हरि ॥२
तं विलोक्यागतमित्यादि—

कृष्ण आगमन देखि गोपिन प्रेम उत्फुल्लित लोचना ।

उठि ठाडे सकल एक वेरि निज देह आई ऐसे प्राना ॥३
काचित् कराम्बुजमित्यादि-काचिद्बजलिना इत्यादि-

कोई गोपी कृष्ण कराम्बुज कर अंजलि हर्षते पकरि ।

कोई गोपी कृष्ण वाहु चंदन भूषित निज स्कंधोपरि धरि ।

कोई गोपी कृष्णचर्दिवत ताम्बूल लेतहि निज अंजलि करि ॥४

कोई गोपी कृष्ण पद कमल हि धरहि तापित स्तनोपरि ॥५

एका अकुटि इत्यादि—

एक गोपी अकुटि चढाइ विहळ मन प्रेम कूँप भरि ।

हानत नेत्र कटाक्ष चलाइ निज ओष्ठ दशनते छुद करि ॥६

अपराऽनिमिषत् इत्यादि—

कोई गोपी निमिष दगते सेवति कृष्ण मुखाम्बुज माधुरि ।

पिवति चित्त तृप्त ना मानि संतन जैसे कृष्ण सेवन करि ॥७

तं काचिन्नेत्रनन्देण इत्यादि—

कोई नेत्र द्वार कृष्ण हृदि लाइ दृष्टि लगाई रहि ताई ।

जैसे योगिन भाव गोपित पुलकानंद नित्य मग्न होई ॥८

सव्वास्ताः केशबालोक इत्यादि—

सकल गोपिन कृष्ण अवलोकि परमोत्सव आनन्दताई ।

विरहज ताप निवर्ति जैसे संस्मृत जना परं ज्ञानहि पाई ॥९

ताभिर्विधृतशोकाभिरित्यादि—

सोक रहित ता गोपियन सह युक्त होय श्रीभगवान हरि ।

सोभा अधिक प्रकाशि राजन् ऐसे पुरुष शक्त्या लम्ब करि ॥१०
ताः समादाय कालिन्द्या इत्यादि—

ता गोपियन ले प्रवेश किन कालिंदी पुलिन बन माँहि ।

विकसित कुन्द मंदार सौरभ अनिल अलि गुंजत ताहि ॥११
शरच्चबन्द्रांशु इत्यादि—

शरद च द्रसा किरन उजियारि समूह तसो दोषहि हरि ।

जमुना निज हस्त तरंग तें कोमल बालु अंचित करि ॥१२

तदर्थनाल्हाद इत्यादि—द्वीपदि

कृष्ण दर्शनानन्द तें ब्रज नारी । सब हृदि रुजहि नाशन हारी ॥

श्रुति जैसे ज्ञान मनोरथ पाई । कर्मांग कि सब मैल कटाई ॥

कुंकुमाक निज उत्तरिला । कृष्णलागि सो आसन करि दिना ॥१३

तत्रोपविष्ट इत्यादि—

तापै बैठे श्रीकृष्ण मुरारी । योगेस्वरांतः हृदि आसन पधारी ॥

सब गोपिन सभाजित ओभा । एक पद धरे त्रिलोक कि सोभा॥१४

सभाजपित्वा इत्यादि—

सभा सन्मानि सो अनंग बियारि । श्री विलास हासीक्षण मनोहारी ॥

कृष्णांग पद निज करहि पशि । जैसे अस्तुत ईषत कुभाषि ॥१५

भजतोऽनुभजन्त्येक इत्यादि—

एक पुरुष भजानुरूप भजै ताई । दोऊ अभजत उत प्रीत लाई ।

एक पुरुष भजेहु ना भजै कोई । कहो कृष्ण विस्तारहि कहा होई ॥१६
मिथो भजन्ति इत्यादि—

भजानुरूप भजै पुरुष जोहि । स्वार्थ उद्भम कारि जानि सोहि ॥

ता में धर्म सुहदता कछु नाहि । आपनि को जैसे अपनो भज ताहा॥१७

भजन्त्य भजतो इत्यादि—

अभज भजे पुरुष जानो एसे । तामें कहण पितर होत जैसे ।
निरुपाधि धर्म सुहृदता जानि । सुन हो सुंदरी इह श्रेष्ठ मानि ॥१६

भजतोऽपि इत्यादि=

भजते भजे नाहि पुरुष जोहि । अभजत जन भजै कहा सोहि ।
एक आत्मारामा दूजात्पक्षमि । मूढ गुरु द्वोह इह चारो जानि ॥१७

नाहन्तु सख्यो इत्यादि—

ऐसे सुनि हँसि सकल ब्रज नारि । परस्पर कहत हीं दृष्टि टारि ॥
एक कहति इह आत्मरामा । नहि लोभित दृष्टि जैसे कामा ॥
एक कहति इह हो आपकामि । नहि गीत वासना मन मानि ॥
एक कहति इह मूढ ऐसे जानि । नहि पति धर्म कहाते बखानि ॥
ऐसे बिचारि परस्पर बानी । इह गुरु द्वोह निश्चय करि मानी ॥
कृष्ण बोले सकल अन्तर्यानी । सखि हो सुन मेरि एक कहानी ॥
चारो पुरुष में हम एकहु नाहिं । एक भेद कि बात तुम्हे हि सुनाहि ॥
भजत जने मैं भजहु नाहि । किरि भजहुँ अनुराग बढ़ाहि ॥

अधनि जन धन पाई जो खोहि । सो चिंता बिनु दोउ सूझत रोहि ॥२०
एवं मदर्थो इत्यादि—

हे गोपिन तुमहि हो अनुरागि । लोक वेद धर्म द्वोडे हम लागि ॥
परोक्ष जो तुम सब भजे मोके । अन्तर्द्यान होइ हम सब देखे ॥
दोषारोपन अयोग्य तुमारो । जाते तुमहि प्रिया हमहुँ प्यारो ॥२१

न पारयेऽहमित्यादि—

कठिन गृह श्रृंखला तोड़ि दिनि । निरपक्ष होई साधु कृत किनि ॥
जा संयोग ते भजे तुमहि मोये । देवायु हि हमहुँते नहि सोये ॥
अपने को मान हुँ ऋणि तियारि । तुमहि प्रति यातु साधु हमारि ॥

इति रासे चतुर्थोऽध्यायः

हतं भगवतो इत्यादि = छंद
 ऐसे कृष्ण कि मधुर प्रिय बोलन सुनि सकल गोपनारी ।
 विरहज ताप निवर्त्याई कृष्ण अंग पश्चि मनोरथधारी ॥१
 तत्रारभत इत्यादि—
 ताहि गोविद होत अनुवृत रासलीला आरम्भ करि ।
 सब सुंदरी मिलि प्रीत मानहि अनन्यवद्ध वाहाँको धरि ॥२
 रासोत्सवसंप्रवृत इत्यादि—
 रास उत्सव संप्रवृत सब गोपी मंडल हि मंडित करि ।
 द्वयोद्वयोर्मध्ये प्रवेश किन एकहि कृष्ण वहु रूप धरि ॥३
 यं मन्येरक्षभ इत्यादि—
 कृष्ण निज निज निकट मानि कंठ लगाइ सब ब्रजनारी ॥
 ताहि सब देव सदारा सह चिमानआरोढ़ये मदभारि ॥
 द्वन्दभि ताहि औघट वाजये पुष्प वर्षा करि घन वारि ।
 गंधर्वपति हि सखिया मह कृष्ण विमल यश गाह न्यारि ॥४
 बलयाणां नूपुराणामित्यादि—
 बलय किंकिन पायन नूपुर स्मजत हि सब गोप नारि ।
 कृष्ण बर्त्माना रासमंडल स्तुमल सब्दहि होत भारि ॥५
 तत्रातिशुशुभे इत्यादि—
 गोपी मंडल सोभित सुंदर भगवान यशोदानंदन हरि ।
 हेम मनि मध्य महा मारकत जैसे सुंदर हार पुष्पि धरि ॥६
 पादन्यासैभुज इत्यादि—
 पदगमक भुज चालन सुंदर रम्य हास भ्रू विलास करि ।
 भंजन मध्य चल कुच पट कुंडल लोल गंड स्थलोपरि ॥
 स्वेद मुख कर रसना अग्रंथ हो कृष्ण बधू सब नारि ।
 गीत सब्द तडित जैसे मेघ चक्र चमकत शोभा करि ॥७

उच्चर्जगुरित्यादि—

ऊँचि गीत कृष्ण सह नृत्यमाना रागकंठि अनुराग भरि ।
कृष्ण पशि सब हर्ष मोदित जो गीत हि जगतावृत करि ॥
काचित् समं मुकुन्देन इत्यादि—द्वीपदि
कोई गोपी ऊँचि तान एक गाई । कृष्ण सह सुरते सुर मिलाई ॥
ऋषभादिक सस स्वर आलापि । अमिश्रित होइ कृष्ण जो संलापि ।
तान मान गत ताल धरतहि । हाथन कि अभिनय भयो बातहि ॥
चलत गत पग नूपुर वजाई । एक कल सब्द सुलोल सुनाई ॥
थमक गमक तें सब चुपकाई । कृष्ण मन हर्ष वह सुख पाई ॥
ता को प्रियसि करिहु सन्मानि । साधु साधु ताहे कहिकै बखानि ॥६
तदेवं ध्रुवमुक्तिन्ये इत्यादि—

कोई गोपि ध्रुव ताल सुर अलापि । ऊँचि सुरते ऐसे राग प्रलापि ॥
ऐसे सुंदर झमक पद गाई । पंचम सुर कि सों राग मिलाई ॥
ताल धरत चलत गत ताई । नाचति गमक ते धायो वताई ॥
कृष्ण सन्मान ताहि को वहु कीन । सौ प्रेम ते ताहे आलिगन दीन॥१०
काचिद्रास इत्यादि—

कोई रास परिश्रम होत जानि । कृष्ण पर्श ठाडि निज सुख मानि ॥
कृष्ण बाहु निज स्कंध धरतायि । बलय मालिका श्लथ होत जायि ॥११
तत्रै कांसगतं वाहुमित्यादि—

कोई गोपि कृष्ण भुज अंस लाई । ग्राण लेत हर्ष रोम पुलकाई ॥
बाहु चंदनोत्पल सुगंध भरि । ताहि धरि चुम्बतहि बारि बारि ॥१२
कस्याश्रिन्नाश्च इत्यादि—

कोई गोपि नृत्यति परम सुठाना । कुँडल लोलहि झलकत काना ॥
जब निज गंडते गंड मिलाई । कृष्ण चर्कित ताम्बूल ताको दई ॥१३
नृत्यति गायती काचिदित्यादि—

कोई गोपि नाचति सुन्दर गाई । कटि मेखला पग नपुर बजाई ।

पार्वी ठाड़ि कृष्ण हस्त पद लाई । धरि श्रांत सतनोपरि सुख पाई ॥१४
गोपिन् लब्धाच्युतं कान्तमित्यादि—

सब गोपिन् कृष्ण कांत जो पाई । जैसे श्रीया एक बलभता लाई ।
कृष्ण वाहु निज कंठ गहिताई । कृष्ण संग विहरे कृष्ण यश गाई ॥१५
कण्ठेऽप्यलालक इत्यादि—

कण्ठेऽप्यल अलक कुडल राजै । स्वेद विदु दै करोलन साजै ।

सुख सोभा अनुपम विराजै । बलय नपूर मधुर सुर बाजै ॥१६
गोप्य, समं भगवता इत्यादि—छन्द

सकल गोपिन् कृष्ण संग तृत्यति सुन्दर गत ताल धरि ।

केश शलथ हि पुष्प वर्षे पद रास सभा अमरा गीत करि ॥१७

एवं परिष्वंग इत्यादि—

आलिगन कराकर्षन हि प्रेम निरचन उहाम हाम परि ।

कृष्ण रमै ब्रजसुंदरी सह जैसे बाल प्रतिविव अम करि ॥१८
तदङ्गसङ्गं इत्यादि—

कृष्णांगसंग केश दूकूल कुच पट्टिका सुदा आकुलेंद्रिया ।

दृढ़ धरत ना पाई राजन् श्रस्तमाल अभरन ब्रजस्त्रिया ॥१९

कृष्णविक्रीडितं इत्यादि—

कृष्ण रास कोडा देखि सब देव स्थिया रहि मोहि ताहि ।

कामाद्वित चन्द्र सगन सह बिस्मृत होत गति रहि ताहि ॥२०

कृत्वा तावन्तमात्मानमित्यादि—

जेते हि गोपिन् तेतेहि रूप धरहि श्रीभगवान् हरि ।

आत्माराम हो गोपियन सहं रति लील जाते रमन करि ॥२१

सासां रतिविहारेण इत्यादि—

सकल गोपिन् रति बिहारते बदन हि अम जल भरि ।

कृष्ण निज कर सुखते राजन् मरंजत प्रेम सों करुणा करि ॥२२

गोप्यः स्फुरत्पुरटकुंडल इत्यादि-द्वीपदि
 ताहि ब्रज कि सब गोप सुन्दरी । कृष्ण कर पर्शत हर्ष भईरि ॥
 पुरट कुंडल गंड स्थल सोभा । सुधा हास ईच्छण मन लोभा ॥
 कृष्ण को सन्मान ऐसे करि दिना । कृष्ण कीत्तियश गीत बहु किना ॥
 ताभियुर्त श्रम इत्यादि—

ता गोपिन यूथ परिश्रम जानि । जमुना जल माँह प्रवेस हुँ ठानि ॥
 मिल कुच कुंकुम रंजित माला । गंधर्वसि गाई चले अलि पाला ॥
 आंत गजी सह गजेन्द्र जैसे आई । सेतु भिंद करि जल प्रवेसाई ॥२४
 सोऽभ्यस्यलं युवतिभिः इत्यादि—

युद्धिन सह जल मिचमाना । परस्परा जल वर्षहि समाना ॥
 तहि जलयुद्ध होत लागि भारि । परस्पर कोई काहु नहिं हारि ॥
 गोपिन कृष्ण को चहुँ ओर घेरि । जल वर्षा करि जैसे घन फेरि ॥
 प्रेम निरक्ष सुन्दर मुख हाँसि । जलकेलि करतहि चित्त हुलामि ॥
 तहाँ कृष्णहु बहु रूप दरसाहि । स्वान्मरत होई रमै जल माँहि ॥
 सब देवन पुष्पहि वरसाई । गजेन्द्र लीला सब देखत लाई ॥२५
 ततश्च कृष्णोपवने इत्यादि—

कालिदी उपवन सब पसारि । जल थल दिक् तट बन न्यारि ॥
 पुष्प गंध ले बायु सेवित ताई । उड़त हि भृंग माति रहि जाई ॥
 जैसे द्विरद करिनी मद माति । ऐसे कृष्ण सह सब गोप युद्धति ॥
 इह शरद कि रास रस लीला । किन गोप बधु सह नंदलाला ॥२६
 एवं शशाकांशु इत्यादि— छंद

सरद रातिहु चंद्र बिराजित कृष्ण आनुसमृत बजनामी ॥
 सेवित सब अवरुद्ध सुरत सरत्काष्य कथा रसाश्रय करि ॥२७
 सस्थापनाय धर्मस्येत्यादि—

सोहि भगवान जगत ईश्वर निज अंश ते इह बधु धरि ।
 धर्म संस्थापन अधर्म नाशन युग युग सो इह अबतरि ॥

सोधर्म कि सेतु वक्ता कर्ता हो धर्म कि जोहि सदा रच्छा करि ।

हे शुकदेव जि सो अब कैसे परदार अधर्म हु आचरि ॥२८

आपकाम यदुपति इत्यादि—

आपकाम रहित बासना दोषित कर्म कौन अभिप्राय करि ।

कहो सुकदेव जि इह जो संदेह कटि जाय मन कि हमारि ॥२९

धर्मव्यतिक्रमो दृष्ट इत्यादि—

देखो परक्षीत धर्म अतिक्रम ईश्वरन कि समर्थ भारि ।

तेजिवन कि दोष नहिं जानाहि जैसे अग्नि सर्व भुगकारि ॥

नैतत्समाचरेत् इत्यादि—

अनिस्वर जने इह कदाचित् सो नहिं आचरे मन माँहि ।

मूढ़ बुद्धि चरै नाश होत हि रुद्र बिनु विष पिवत ताहि ॥३१॥

ईश्वराणां वचः सत्यमित्यादि—

ईस्वर कि वचन सत्य इह जानि तामें कोई एकहु आवरि ।

सो वचन में जो सुबचन होय बुद्धिमान सो आचरन करि ॥३२॥

कुशलाचरिते इत्यादि—

कुशल आचरन करि याको इह कछु अर्थ प्रयोजन नहिं ।

विपर्ययते अनर्थ नहि याको ताको निरहंकार कहि ॥३३

किमुताखिल सत्वानामित्यादि—

त्रिलोक मधि पंचि पशु नर सकल जन देबादि जोहि ।

ईस्वर सेवित जन कि जानि कुशल अकुशल द्वौ नहि ॥३४

यत्पादपंकजपराग इत्यादि—

जो पद पंकज पराग सेवित भक्तजन नित्य तुप होई ।

जोग-प्रभावते सविधृत इह कर्म गुनबंध कटोई ॥

मुनय स्वतन्त्रता आचरन करि उनहिं को नाश होत नाई ।

सो ईस्वर अब इच्छा वपु धारे ताहे गुनबंध कहाँ ते आई ॥

गोपीनां तत्पतिनाङ्च इत्यादि—

गोपियन हु ता पतियन कि सकल प्राणि देहा धारिन को ।
जो अंतर्चरत सो देह धारहि एसो क्रीडा योग्य होत ताको ॥

अनुग्रहाय भक्तानामित्यादि—

भक्त जन अनुग्रह कारन मानुष देहा करि आश्रय ।

नरानुरूप क्रीडा जो किन सुनत भक्त तत्परा होय ॥३७

नासूयन् खलु कृष्णायेत्यादि—

ब्रजबासीजन असूया ना किन कृष्ण मायाते' मोहित भई ।

निज निज स्त्रिया निकट आपनि ऐसे हि मन मानई ॥३८

ब्रह्मरात्र इत्यादि—

ब्रह्म रातिन उपावृत जानि हु कृष्ण अनुमोदित सो सब हि ।

भगवत प्रिया अनिच्छा गोपियन निज निज गृह जातहि ॥३९

विक्रीडित' ब्रजवधूभिरित्यादि—

ब्रजवधू सह रासलीला किन वृंदाबन कृष्ण हि ।

ध्रद्धायुक्त होइ सुनत जो हि अथवा इह कोई वर्नतहि ॥

श्री कृष्ण कि श्रेष्ठ एक भक्ति हु निश्चय ताको इह मिलतहि ।

हृदि काम रुजहु नास जातहि सो सर्वज्ञाता तत्व कि होहि ॥४०

रास पंचाध्यायि श्री भागवत सुकदेव जू यह विस्तारहि ।

गोविंदबरनदास दीन हु भाषा पद करि गावहि ॥४१

इति रासे पंचमोऽध्यायि भाषापद गीयते ॥४

समत १८८६ साल माहे १२ कर्त्तिक सुदि द्वादशि तिथौ आदित्यवारे

द्वादश दंड वेला उदित समये श्रीधाम वृंदाबने योगपीठ

स्थाने इह रास पंचाध्यायि भाषापदगीत'

समाप्ति स्यात् ॥

श्री वृन्दावन धीरशमीरकुञ्ज जगदीश परिष्डित राज मानयि ।

ताहि श्री सनातन माहान्त को इह भाषा गीत लिख देयि ॥४

॥ श्री चैतन्यचन्द्राय नमः ॥

ॐ श्री राधादामोदरो जयति ॐ

अथ भजनपद्मति लिख्यते

—•★•—

सुमरौ कृष्ण चैतन्य हरि, जय जय युगल प्रकास ।
कृपा दृष्टि मोपर करौ, लहौं वृन्दावन वास ॥१॥
जाकरन हरि गौर भै, कहत जथामति मोर ।
चैतन्य चरित अगाध है, काढु न पायौ ओर ॥२॥
एक समय बैठे हरी, सोस महल के माहि ।
निज तन देखि विस्मय भये, भाव कुवरि के चाहि ॥३॥
इही चाह मन में भई, किय प्यारी कौ रूप ।
निज रस आस्वादन करै, लहैं जुगल स्वरूप ॥४॥
अन्तर में है श्यामता, बाहिर हेम प्रकास ।
प्रेम पदारथ दें सबै, धर्यौ जु अपने पास ॥५॥
यह आसा धरि चित्त में, वरनौं चैतन रूप ।
स्याम स्यामा मिलि भये, गौर अनूप सरूप ॥६॥
महा प्रभु जू कौ प्रेम कछु, मोपैं कहौं न जाय ।
सागर कौ है वारि सब, गागर में न समाय ॥७॥
नित्यानन्द वन्दों सदा, लखि ग्रन्थन कौ सार ।
रोहिनिनन्दन प्रगट भे, शेस जासु अवतार ॥८॥
श्री अद्वैत भगवान हैं, नाहिं जु न्यारौ रूप ।
अगतिन गतिदायक सुखद, भक्ति ज्ञान के रूप ॥९॥

श्री अद्वैत कृपा करो, हो तुम परम सुजान ।
 दीन हीन मोहि जानि के, देउ भक्ति रसदान ॥१०॥
 सब गौर भक्त वृन्द कों, मेरे कोटि प्रणाम ।
 अपनो जानि कृपा करो, नाहि मोहि कहुँ ठाम ॥११॥
 गौर वृन्द को सुजस अति, नैकहु कह्यौ न जाय ।
 स्वल्प बुद्धि हम जीव हैं, कैसे वरनै ताय ॥१२॥
 निज चित मधि अवलम्ब हित, कीनो जतन अनूप ।
 रसना सदा रटिवो करो, प्राण सनातन रूप ॥१३॥
 रूप सनातन चरन है, जाको दृढ़ विश्वास ।
 सो मेरे प्रेम इष्ट हैं, हौं ताकौ निज दास ॥१४॥
 मन वच क्रम ध्याऊ सदा, दोऊ परम दयाल ।
 जिनके लिए प्रगट भये, गोविन्द मदन गुपाल ॥१५॥
 ऐसी कृपा कीनि दीनों, दृढ़ वृन्दावन वास ।
 सबे रहस्य जनाय के, राख्यौ अपने पास ॥१६॥
 अद्यपि परिकर में रहै, लहै जु रूप अपार ।
 को कवि ऐसे जगत में, पावै छ्रवि को पार ॥१७॥
 गोपाल भहु परिकर सहित, बंदौ वारहिं बार ।
 दीन हीन द्वारें परे, कौन उतारें पार ॥१८॥
 गोपालभहु सुमिरन करौं, दृढ़ वृन्दावनवास ।
 जिनके मस्तक राजें सदा, राधारमन विलास ॥१९॥
 राधारमन की सेवा करे, धरे जु सखी सरूप ।
 प्रेमानन्द में बूढ़यौ रहै, ईहे बात अनूप ॥२०॥
 श्री रघुनाथ भट्ट वंदौं, है जू परम उदार ।
 श्रीमद् भागवत को रस, जानत हैं सब सार ॥२१॥
 मिस्य सेवा आश्रम हह, बन्धन नाहिं जू एक ।
 कृष्ण प्रेम में छुकें रहें, इह जिनकी है टेक ॥२२॥

रहें निकट ब्रजनाथ के, श्रीभट्ट जू रघुनाथ ।
 सदा सखी रूप में विचरें, छाँड़ परिकर साथ ॥२३॥
 श्री रघुनाथदास को हौं, जनम जनम को दास ।
 मानस सेवा लीन मन, श्री राधाकुण्ड में वास ॥२४॥
 रस ग्रन्थन वरनन करें, हरें जगत को ताप ।
 रसना ऐसे कृपाल को, करों निरन्तर जाप ॥२५॥
 जीव गुसाईं जीवन को हैं सदा सुखदाह ।
 राधा दामोदर रीझि, के आप अपनाइ ॥२६॥
 निजहि सक्ति दे जीव को, सुनै ग्रन्थन को सार ।
 विद्या रूप प्रगट भये, जानौ जू निरधार ॥२७॥
 श्रीमद्भागवत ग्रंथ जु अभ्यास हैं ऐसे ।
 हाथ में आमलो रहें और निजु कौं जैसे ॥२८॥
 रूप सनातन दोऊ मिलि भक्ति जीव में अरापि ।
 गुविन्द मदन गोपाल के दोऊ सेवा में थापि ॥२९॥
 रूप सनातन दुहुँ करें जीव प्रीति अति भारी ।
 आत् पुत्र प्रवीन जानि किये सब अधिकारी ॥३०॥
 श्री गोविन्द सेवा में आप बड़े प्रवीन ।
 हड़ बृन्दावन वास कियो कृष्ण प्रेम में लीन ॥३१॥
 जिनको फल जु प्रगट भये श्री गुसाईं कृष्णदास ।
 कृष्ण प्रेम में लीन है नाहिनें जग को वास ॥३२॥
 निकट स्यामा जु स्याम को निरखै रास विलास ।
 ऐसे गुसाईं कृष्णदास जु पूरी मन की आस ॥३३॥
 श्री नन्दकुंवर गुसाईं जु नन्दलालहि लड़ाय ।
 बड़े गम्भीर आस हिय थाह कोऊ नहिं पाय ॥३४॥
 जिनकौ भजन फल जु है सूनो मन दैं भाई ।
 देखि लेहु प्रगट भये श्री ब्रजकुंवर गुसाईं ॥३५॥

श्री ब्रजकुंवर गुसाईं जु भयेहि रूप अनूप ।
 गोविन्द गाथा गावै ध्यावै गोविन्द रूप ॥३६॥
 जिनको पुण्य प्रताप लक्ष्मौ लाला बृन्दावन ।
 गुन देखि अपार नाना रूप महा सुहावन ॥३७॥
 कुंवर बृन्दावन प्रगट भै जानौ प्रेम सरूप ।
 दृह तन में मिजि फिले आप गुसाईं रूप ॥३८॥
 सो आनन्द जू प्रगट कछू मोपै कह्यौ नहिं जाहिं ।
 देखि लै प्रगट गुसाईं गोपी रमन के माहिं ॥३९॥
 श्री गुसाईं गोपीरमण, हैं जु परम उदार ।
 साधु सेवा परायन जाने, कृष्ण प्रेम कौ सार ॥४०॥
 संकीर्तन में पड़े रहैं लहैं नाम अपार ।
 ऐसे गुसाईं कृपा करि, मोहि उतारो पार ॥४१॥
 मनरु वच क्रम करि ध्याऊं, श्री गुसाईं ब्रजलाल ।
 दीन जानि कृपाजु करौ, हौ तुम दीनदयाल ॥४२॥
 सब अवगुन मोपै भर्यौ. है गुन नाहिं जु एक ।
 निज जन जानि कृपा करौ, निर्भै मन की टेक ॥४३॥
 कर जोरी विनती करौं, गुसाईं नवल जु लाल ।
 सेवा परायणहि रहैं, निरखि दामोदर लाल ॥४४॥
 सङ्गीत विद्या में निपुण हैं महा चतुर सुजान ।
 बीन लै बजावै सदा, गावै मनोहर तान ॥४५॥
 रिभयौ रिभवार कछु रीझि, दीनौ वस्तु अपार ।
 पुत्र भये गोविन्द लाल जू उभै परम उदार ॥४६॥
 आठ प्रहर चौसठि घरी, भजन में हि मन दीन ।
 श्री गोविन्द चरन में मन रहे, हैं जु परम प्रबोन ॥४७॥
 इह सबहि नित्यसिद्ध हैं, मन में जानि जु लेहु ।
 जीव उधारन कारनैं, प्रगट करै निज देहु ॥४८॥

गुरु गोष्ठी सब इष्ट हैं, विचरे परिकर मांहि ।
 इनकौं कबहु जानौ मति, ईतर नारि नर नाह ॥४६॥
 इह पदार्थ पहिचान कौं, नाहिं जो आन उपाय ।
 साधु चरन रज सीस धरै, सीत साधुनि को खाय ॥५०॥
 साधु संग विचरै सदा, वसै साधुनि के पास ।
 इब पदार्थ जान्यौ परै, पूरै मन की आस ॥५१॥
 यह प्रबन्ध जु कहो हम, मन वच करि विश्वास ।
 सुनै सुनावै जो कोऊ, पहुंचे हरि के पास ॥५२॥

ह्रति भजन पद्धति ग्रन्थे श्री गुरुवन्दना

प्रथम विभाग



प्रिया सहित कृष्ण इष्ट है, सन्त जननि के प्रान ।
 परम हंस नम करि लऊँ, भक्ति सुधा कौं पान ॥१॥
 रसिक जन मन हंस मन, यह कीनौ निरधार ।
 भक्ति तत्व रस अमृत है, ज्ञान कर्म सब खार ॥२॥
 भक्ति रस अमृत सिन्धु है को कवि पावे पार ।
 रूप गुसाईँ प्रथम में, कीनौ न्यारौ निरधार ॥३॥
 राधा सह श्रीकृष्ण जू, प्रगट स्वयं भगवान ।
 सब तत्वनि तें भगति तत्व, जानि लेहु प्रधान ॥४॥
 निज रसनाहि पावन हित, कछु कहियै नहिं जात ।
 सागर कौं वारि किधौं, नाहिं जु सीप समात ॥५॥
 भक्ति महारानी को जो, नेंक आप अपनाय ।
 सबै क्लेश तबहिं सो जू, आप सो आपहिं जाय ॥६॥
 सबै सुख सबै सम्पदा, आवै आपहि आप ।
 चारि प्रकार मुक्ति लाँ, मन में नहिं कछु भाव ॥७॥

यह बात श्री कपिल मुनि, भागवत मैं गाय ।
 दुर्लभ भक्ति है जगत में, आपहि वेद बताय ॥८॥
 प्रेमानन्द की छुकनि, गाढ़ौ मन जब होय ।
 श्रीकृष्ण जू तिन दिग में, ठाड़ौ आपते होय ॥९॥
 मन की गति है कृष्ण में, मुक्ति चाह नहिं और ।
 प्रेमानन्द में दूबयौ रहै, रसिकनि के सिर मौर ॥१॥
 रेनी बनी है प्रेम की, मन पढ़ लेहु जु बोरि ।
 कृष्ण रङ्ग सदा एक रस, भूल कबहुं मति छोरि ॥११॥
 इहै भक्ति द्विविधि पुनि, वैधी राग विशेष ।
 अब वैधी भक्ति कहुँ, पांछे राग की लेख ॥१२॥
 यह विधि भक्ति भेद हैं, जानि लै तीन प्रकार ।
 प्रथम साधन रूप दूजौ, भाव रूप निरधार ॥१३॥
 तीजौ भक्ति भये सब, शास्त्रन मैं गावे ।
 बहु भेद और भक्ति को, को कवि पार जु पावै ॥१४॥
 वैधी भक्ति लहन कहौ, सुनौ सब रसिक सुजान ।
 यह भक्ति सबकौ मूल हैं, मानि लै मन करि ज्ञान ॥१५॥
 मन अनुराग नहिं करै, भक्ति भेद उनमान ।
 ताहि वैधी भक्ति करि, सबै लेहि पहिचानि ॥१६॥
 कोउ भाग्य उदय, अद्वा हरि में होय ।
 आसक्ति गाढ़ वंधि नहि, विषय छांडि नहिं जोय ॥१७॥
 ऐसो जिनको देखिये, निरन्तर बुध्य प्रचार ।
 सुखदाहक जानौ ताहि, वैधी भक्ति अधिकार ॥१८॥
 श्री गुरु चरन सरन लहौ, सीखौ धर्म की रीति ।
 गुरु सेवा विश्वास दृढ़, साधु पथ में प्रीति ॥१९॥
 सत्धर्म पूछौ हरि लिए, त्यागौ भोग विलास ।
 उद्घम देह निर्वाह कौ, गङ्ग द्वारावतो वास ॥२०॥

एकादसी व्रत अरु जागरन, भूलि कबहुँ मति छोड़ि ।
 पीपल आवलौ पूजियै नाहि इनको धौं तोड़ि ॥२१॥
 यह दस विधि है भक्ति की, प्रथम अङ्ग करि जानि ।
 हरि विमुखन कौ त्यागौ सदा शिष्य बहुत मत ठानि ॥२२॥
 वेद पुरान गावै सदा, सुनि हौं देकें कान ।
 बहु आरम्भ सौं डरौ, सास्त्रन अनेक बखान ॥२३॥
 व्यवहार में उदार चित्त सोग न कीजै नेक ।
 और देवन कूँ निदौ मति, दुख और नहिं देख ॥२४॥
 सेवा नामापराध तें, डरिबौ करौ सदाई ।
 गुरु हरि साधु निन्दा सुनि, मारिये कै उठि जाई ॥२५॥
 यह दश अङ्ग त्याग दियौ, लियौ दस अङ्ग निरधार ।
 बीस अङ्ग भक्ति रानि के, मिलिवै को निज द्वार ॥२६॥
 गुरु पाद आश्रय करै, कृष्ण धर्म में लीन ।
 गुरु सेवा में विश्वास है, बीस सौं उत्तम तीन ॥२७॥
 छापा तिलक करै गरै, धरै तुलसी की माल ।
 कबहुँ नहिं आवै जु पास, जम के दूत विकराल ॥२८॥
 हरि प्रसाद सौं नियम करि, खान पान परिधान ।
 प्रेम सो भीने नित्य करि, रीझेंगे भगवान ॥२९॥
 भूमि परि प्रनाम करि, रहौ ठाड़ौ हरि गुरु देखि ।
 मन्दिर लौं सङ्ग जाइये, यह है चलन विशेषि ॥३०॥
 ग्रह तें मन्दिर जाइये, परिक्रमा दे चारि ।
 पूजन परिचर्या कीजिए, मन कौ निश्चय धारि ॥३१॥
 गीत गाइकै कीर्तन करौ, जप मनहिं मन माहिं ।
 बिनती प्रचार करौं स्तव, पाठ मांहि अवगाहि ॥३२॥
 प्रसाद आस्वादन करौ, अरु चरणामृत पान ।
 प्रसादी माला उर में धरौ, सुगन्ध धूप को ध्रान ॥३३॥

श्रीमूरति कौ परस करो, निरखि मनोहर रूप ।
 आरती में विसेस करि, देखौ जुगल सरूप ॥३४॥
 समय समय उत्सव करौ, जथा सक्ति विचारि ।
 कथा सुनौ रसिकनि सहित, देखौ कृपा अपार ॥३५॥
 कृष्ण सुमिरन करौ नित, ध्यावो कृष्ण कौ रूप ।
 दास्य भाव सुन्दर जु अति, सख्यभाव अनूप ॥३६॥
 आत्म निवेदन करौ प्रिय, वस्तु सब आनि ।
 हरि निमित्त चेष्टा करौ, सरण सरणागत को जानि ॥३७॥
 भक्ति की सेवा करौ, तुलसी में करि प्रीति ।
 मथुरा में वसौ सदा, देवो शास्त्र में चीत ॥३८॥
 साथु सङ्ग महोत्सव करो, जथा वृत्ति करि विस्वास ।
 कार्तिक दासोदर पूजि कै, जाउ लड़ती जू के पास ॥३९॥
 जनमोत्सव आदि लै सब, करौ उत्सव बहु प्रीति ।
 श्रद्धायुत होय मूर्ति की, धरौ सेवा में चित्त ॥४०॥
 श्रीमत् भागवत की कथा, सुनौ रसिकनि के संग ।
 छिन छिन माहिं बढ़ै अति, प्रेमानन्द तरङ्ग ॥४१॥
 एक रस के उपासक अरु, कोमल होय सुभाव ।
 तासौ निसङ्ग सीखियै, सबै भजन को भाव ॥४२॥
 भक्ति चौसठि अङ्ग कहयौ, गहो विस्वास विचारि ।
 हह चौसठि अङ्ग मधि, उत्तम पञ्च निरधारि ॥४३॥
 भगवत् भागवत सेवन करौ, मथुरा रसिकन के सङ्ग ।
 हह पाँचौ मन मैं जानि, करौ कीर्तन में रङ्ग ॥४४॥
 भक्ति पटरानी के जू, अनगिनती हैं अङ्ग ।
 गनन में जु आवे नहीं, कवहुँक सिंधु तरंग ॥४५॥
 एक अङ्ग में वहु अङ्ग हैं, पुनि चौसठि अङ्ग प्रधान ।
 अम्बरीष वहु अङ्ग में, एक परीक्षित जान ॥४६॥

वैधी भक्ति निर्नय भयौ, करौ जु राग (भक्ति) विचार ।
 इह बात अति कठिन है, नाहिं जु पाऊं पार ॥४७॥
 ॥ इति चौसठि अङ्ग भक्ति वर्णनं नाम दुतिय विभाग ॥

—५—

चित्त में विचार करौ, अब सुनौ राग स्वरूप ।
 स्वाभाविक लगन गोविन्द में, यहै राग कौ रूप ॥१॥
 इह राग ते कृष्ण में, करौ जु गाढ़ी प्रीति ।
 रागात्मिका भक्ति की, बरनी है यह रीति ॥२॥
 इह रागात्मिका भक्ति और कोउ नहिं पाय ।
 नंदादिक परिकर में उह, नित रहयौ है छाय ॥३॥
 इह रागात्मिका भक्ति, विविध प्रकार करि जानि ।
 प्रथम कामरूपा दूजौ, सम्बन्ध रूप पहचानि ॥४॥
 सो कामरूपा भक्ति है, जानौ मन जु माहिं ।
 श्रीकृष्ण सुख जानि कै, करै भोग की चाहिं ॥५॥
 इह कामरूपा प्रेम है, श्री शुकदेव प्रमान ।
 ब्रजदेविन में बसे सदा, मन में निश्चय जान ॥६॥
 श्रीकृष्ण परिकर अनुगत होय, जु भजै अविराम ।
 रागानुगा भक्ति जु है, कहिये ताकौ नाम ॥७॥
 अपने अपने भाव करि, सेवा में चित देहि ।
 श्री गुरुदेव उपदेश तें, सिद्ध देह जू लेहि ॥८॥
 मानसी सेवा कौं करौ, ब्रजवासि अनुगत होय ।
 संकीर्त्तन में मन धरौ, स्थिति साधक देह ॥९॥
 जो कोउ इहि विधि सेवा नित हीं करै निज टेक ।
 श्यामा स्यामहि रूप तें चित्तहि ठरै न नैक ॥१०॥
 इति श्री भजन पद्धति ग्रन्थे साधन भक्ति
 वरननं नाम त्रितिय विभाग

श्री चैतन्य आनन्दधन, निज तन प्रेम स्वरूप ।
 श्री बृन्दावन चिदानन्द हैं, सदा सनातन रूप ॥१॥
 कृष्ण सुमिराँ परिकर सह, हितदायक नित पास ।
 कृष्ण कथा श्रवण करि, करौ ब्रज में नित वास ॥२॥
 ब्रज को रज में पर्यौ रहौ, यह आसा निसि भोर ।
 कृष्ण इष्टि मोपर करौ, रसिकन के सिर मोर ॥३॥
 ब्रज औरासी कोस सब, चिदानन्द मय धाम ।
 गो गोप संहित हरि जहाँ, राजत है अभिराम ॥४॥
 रतन जटित श्रवनि सब, कलपतरुन की डाल ।
 पात पात चिदानन्दमय, फुलफल परम रसाल ॥५॥
 धेनु चरत चिदानन्द मय, बाजत बेनु रसाल ।
 बिहरत अति आनन्द सौ, निरखौ मदनगोपाल ॥६॥
 विरुद्ध लता बस कलपतरु, पारिजात सब फूल ।
 घाट वन्यौ है रतन जटित, झज्जकत जमुनाकूल ॥७॥
 ब्रजधासी जन रहत हैं, सत् चिदानन्द सरूप ।
 बानी उच्चरै गीत रसमय है बात अनूप ॥८॥
 नख सिख तै सुन्दर तनु, चालि नृर्ति समान ।
 नृत्य गान में जो सुख उपजै, को कवि करै बखान ॥९॥
 सरोवर चिदानन्दमय, पय सब अमृत समान ।
 चारि रङ्ग के कमल मैं, मधुप करत बहुगान ॥१०॥
 ब्रजभूमि सदा एक रस, प्रलयातीति करि जान ।
 श्रुति पुराण सब संहिता, निज मुख देत प्रमान ॥११॥
 न्यारौ आत्मा देह तै अरु, रहै देह मैं व्यापि ।
 ऐसै ब्रज ब्रह्मांड मैं, रहै निरन्तर आपि ॥१२॥
 चिदधन ब्रह्म तन्यौ आप, ब्रज देखि अनोठो ठाम ।
 दम्पति दोउ विहरत जहाँ, मिलि कै स्यामा स्याम ॥१३॥

ईह पूर्णनन्द रूप ब्रज, राजत जग के माहिं ।
 मोहै माया कृष्ण कौ, कोउ देख नहिं जु पाय ॥१४
 कर जोरि विनती करै, मन होय मति अति दीठ ।
 ईह ब्रज कौं भूलि करि, नाहिं देह कभूं पीठ ॥१५
 ऐसें मन हवै है कभूं, पड़ि रहु जमुना तीर ।
 तरु साखा निरखौं सदा, नैननि भरि २ नीर ॥१६
 श्री ब्रज मण्डल प्रलय में, कबहु नाहिं जू आय ।
 विष्णु चक्र में रहै नित, इह सब वेद बताय ॥१७
 इह ब्रज धरनी में है, निरवधि ऐसे होय ।
 ज्यौं बारिज बारि में है, बारि ते पृथक न सोय ॥१८
 ब्रज सहस्र दल कमल करि वेद पुराण जु गाय ।
 सो कमल मधि बृन्दावन, रसिकनि के मन भाय ॥१९
 बीस कोस बृन्दा विपिन, हरी देह करि जानि ।
 एक प्रेम को प्रवेस, जहाँ नहिं कम अरु ज्ञान ॥२०॥
 कहा कहियै महिमा सब, बृन्दावन निज धाम ।
 चलत फिरत सुनियत जहाँ, राधावर के नाम ॥२१
 रतन जटित अवनी जु सब, कलप तरुन की छाँह ।
 लाडिली लाल विहरत सदा, गहैं सखिन की वाँह ॥२२
 जता द्रुम में लपटयौ रहै, बिच बिच कुंज कुटीर ।
 सीतल मन्द सुगन्ध जहाँ, बहत त्रिविधि समीर ॥२३
 पटरितु जहाँ नित बसै, धरिकै निज २ रूप ।
 समय समय सेवा करै, निरखे जुगल सरूप ॥२४॥
 रितुराज वसन्त की जहाँ, है बढ़ौ बढ़ाई ।
 सोभा लिए रहत सदा, है सबको सुखदाई ॥२५
 बेष्टित जमुना बारि सौं, तट में अमल कलोल ।
 बृन्दावन पहिरै मनौ, इन्द्र नील मनि चौल ॥२६

चारि रङ्ग के कमल जहाँ, लाल नील अरु पीत ।
 सेत कमल सुहावनौ, मधुकर गावै गीत ॥२७
 लता सहित द्रुम भुके रहैं, परसै निरमल नीर ।
 कुल कल पत्र सुहावनौ, निरखौ जमुना तीर ॥२८
 जहाँ मोर कुहकै सदा, कोयल गावै गीत ।
 सुक सारी कहै कथा, सुनिके उपजौ प्रीत ॥ २९ ॥
 श्री बृन्दावन आनन्दमय, सबके ऊपर राजत ।
 सारदा सतमुख सौ, कछु कहिबे को लाजत ॥३०॥
 खग भूग तरु लता अरु, सोहें कुंज कुटीर ।
 बापो तड़ाग सुहावने, दह में निर्मल नीर ॥३१॥
 बहुत द्रुम करि सघन वन, घन सौंरह्यौ जु छाय ।
 जुगल मधुकर रहै जहाँ, गीत मनोहर गाय ॥३२॥
 चरण चलौ बृन्दाविपिन, नैन बृन्दावन देखि ।
 रसना बृन्दावन रटौ, बृन्दावन चित लेखि ॥३३॥
 जनम जनम बृन्दावन बसौ, मन में करौ यह टेक ।
 तृण लता है परयौ रहौं, याहि न छाँड़ौ नैक ॥३४
 जाहें त्यागें बन्धुजन, मात पिता अरु भ्रात ।
 ताहि कृपा करै बृन्दावन, यहै रसीली बात ॥३५
 टूक टूक है जात तन, पावै दुःख जु अनेक ।
 तउ न छाँड़िये बृन्दाविपिन वर, मन में राखि विवेक ॥३६
 शिव उद्धव रु चतुरानन करै, जु मन में चाह ।
 गुलमलता है बसें तहाँ, बृन्दावन रज माँहि ॥३७॥
 श्रीपति श्रीमुख कहैं जब, विपिन राज की बात ।
 बैकुंठ छाँड़ि इन्द्रा, बसिवै कौ ललचात ॥३८॥
 बृन्दावन चिदानन्दमय, स्यामा स्याम सरूप ।
 रसिक जन निरखै जु सदा, बृन्दावन कौ रूप ॥३९

दल सहस्र कमल मध्य, करि बृन्दावन धाम ।
 इह कमल मध्य अष्टदल, ताकौ करै बखान ॥४०॥
 दक्षिण ओर रास मण्डल, प्रथम पाँखड़ि जानि ।
 रास निरन्तर करै जहां, आपहि रसिक सुजान ॥४१॥
 अग्निकोन में सोहै दल, निधुवन धीर समीर ।
 जहां हरि विहरत सदा, गावत मधुकर कीर ॥४२॥
 इह पूरब दल जानि लै, भयौ केसी जहाँ निपात ।
 कोटि गङ्गा स्नान फल, मोर्णे कह्यौ न जात ॥४३॥
 चौथौ दल चीर घाट जु, निहचै मन में जान ।
 चीर हरन गोपिन के जहाँ कीने हैं भगवान ॥४४॥
 वायब दिसा में पञ्चदल, सूरज मन्दिर राजत ।
 सूरज द्वादस हरि जू के, पूजन लिए विराजत ॥४५॥
 छुटे दल मध कालीदह, जाके निर्मल नीर ।
 काली कौ कीनौ दमन, महा सुहावनौ तीर ॥४६॥
 सातों पाँखड़ी जन्मस्थल, यहाँ अनूपम ठाम ।
 जन्म पत्नीन पर कृपा करि, भोजन कियौ कृष्ण राम ॥४७॥
 नैरित कौन में अष्ट दल, करौ मन में ध्यान ।
 व्योमासुर भयौ वध जहाँ, संहिता वाराह प्रमान ॥४८॥
 ईह अष्टदल कमल मधि, जोग पीठ जू होय ।
 रतन जटित मन्दिर जहाँ स्यामास्याम विगौय ॥४९॥
 देखौ मन्दिर वन्यौ अद्भुत जोग पीठ के माहि ।
 छारही या मन्दिर पर कलप तरुन की छाँहि ॥५०॥
 भाँति भाँति के लगे नग भक्त काम जड़ाव ।
 वा मन्दिर के सोभा पर बार बार बलि जाँव ॥५१॥
 फटिक मनी की नीती बनी इन्द्रमनी की छात ।
 बिच बिच काम बन्यौ मनोहर निरखत नैन सिरात ॥५२॥

चौखट बनी है इन्द्रमनी की, भाँति भाँति के काम ।
 समय समय की सेवा करै द्वार सखी अभिराम ॥५३॥
 लालमनो के किवार बने मोहत हैं श्रति भारी ।
 जो द्वारै निकसत सदा सुन्दर प्रीतम प्यारी ॥५४॥
 झरोखा जु झजकत जहाँ जाली बनी अनूप ।
 जो जाली है निरखे सदा सखी सब जुगलसरूप ॥५५॥
 नाना भाँति की चितराम जहाँ खग मृग द्रुम अरु बेलि ।
 कचौसठि कोक कला राझै जहाँ देखि करत है केलि ॥५६॥
 मन्दिर की चहुं ओर बनी अद्भुत दीरघ चौक ।
 फटिक मनि की फरस बँधी मिटै नैन की सोक ॥५७॥
 चंद्रमणी की होड बनी निर्मल नीर जु ताहि ।
 चन्द्रमुखिन की झांइ परै सबै चन्द छै जाहि ॥५८॥
 मन्दिर मध्य रतन जटित सिंहासन परम अनूप ।
 तामैं राधा दामोदर विराजत जुगल सरूप ॥५९॥
 मन्दिर मध्य पलङ्ग है सोभा कही नहिं जाहि ।
 पृष्ठी बनी हरित मनी की अद्भुत काम जु ताहि ॥६०॥
 पाये हैं चन्द्रमनी के जह्यौ अनूपम लाल ।
 लगे शुंघरु चहुं ओर सों सोहे परम विशाल ॥६१॥
 जरकसी तारनि सौं बुन्धौ बिढ़ी है सेज अनूप ।
 सेज बन्ध खेच्यौ जाहि आय मंजरी रूप ॥६२॥
 यह पलंक की सोभा कछु कहि सकै नहिं बैन ।
 उपरि चादरि सुहावनो ज्यौ दूध की फैन ॥६३॥
 लगे गेदुवा मनोहर, छुबि है अपरम्पार ।
 ऐसे पलंक बैठे दोउ, राधा नन्दकुमार ॥६४॥
 इहि विधि पौढ़े हैं दोउ अलसाने हैं जू नैन ।
 मानौ सब जीत कै आनि सोयौ है मैन ॥६५॥

भुज पर भुज मेलि कै, दै अङ्ग में निज अङ्ग ।
कंचन बेलि लपटी रही ज्यों तमाल के सङ्ग ॥६६॥

इति श्री भजन पद्धति श्री वृंदावन महामा
वर्णनं नामचतुर्थं विभागः

अब कहूँ सुनो रसिक जन प्रात् समय की बात ।
सखि वृंद संग लै वृंदा जु स्यामा स्याम जगात ॥१॥
सुख सौ हैं पौढ़े दोउ करिलै मन ध्यान ।
सखि सब आनि जगावै गावै भांति भांति की तान ॥२॥
अनगिनति है सखी जहां को कवि पावै पार ।
श्री शुकदेव मुनि पै भै नहीं नेंक निरधार ॥३॥
सब सखिन लै आठ सखी उत्तम हैं करि जान ।
आठ सखिन में ललिता जु को जानि लेहु प्रधान ॥४॥
साधक भजन काज कहौं अष्ट सखिन के नाम ।
नाम लेत पावै नवल वृंदावन निज धाम ॥५॥
ललिता जू विशाखा अरु चिन्ना चम्पक बेलि ।
तुंग विद्या इन्दुलेखा करै नाना विधि केलि ॥६॥
रंग देवी सुदेवि प्रिया जु है अति प्यारी ।
यह सखिन की हौं जाऊँ बार बार बलिहारी ॥७॥
श्री ललिता सखी बड़ी निज नाम है जाकी ।
चारु गोरोचनाहि सी अङ्ग कांति है ताकी ॥८॥
सप्त विंस दिन प्रिया सौं ऊपर बड़ी करि जानि ।
मोरपिंछ से बसन हैं करिलै मन में ध्यान ॥९॥
जिनके साथ रीझ करि विरिले स्यामा अरु स्याम ।
यह ललिता जु कौं मेरे हैं कोटि कोटि परनाम ॥१०॥

खलिता के जूथ में सुनौ अष्ट सखिन कौ नाम ।
 रतनप्रभा रतिकला, भद्ररेखा सुभद्रा ठाम ॥११॥
 सुमुखी अरु धनिष्ठा सखी सेवा करै हैं नित्त ।
 कलापिनि कलहंसी सखी, हरै सखिन कौ चित्त ॥१२॥
 श्री विशाखाजी सखिन में अति प्यारि करि जानि ।
 विजुली सी निज अङ्ग शोभा वरु तारावति जानि ॥१३॥
 प्यारी जू के वयस सों साहसहि इहै जान ।
 चस्तु सेव में रहै वरत इहै जु मन में ठान ॥१४॥
 माधवी मालती विशाखा की गण में हैं परधान ।
 गन्धरेखा कुंजरिजू है मैरे हैं निज प्राण ॥१५॥
 अहनी चपला देवी सेवा में रहे सदाईं ।
 सुरभी सुमुखी को जु जस वेदन में गाई ॥१६॥
 और अनेक सेवा करै रहै पिय प्यारी पास ।
 विशाखा जू कौ प्रनाम करि पूरौ मन की आस ॥१७॥
 चम्पकलता बंदौं सदा चम्पासी निज अङ्ग ।
 सोसनी सारी पहिरै जाको अद्भुत रङ्ग ॥१८॥
 रसोई की सेवा है तिनकी निज अधिकार ।
 ऐसे चम्पकलता है मेरे प्राण अधार ॥१९॥
 सुचरित कुरङ्ग नयनी अरु बन्दौं चंपक बेलि ।
 मनि कुण्डलि मण्डनी सौं करै नाना विधि केलि ॥२०॥
 चन्द्रिका चन्द्रजलिका जु दोऊ परम सुजान ।
 कुन्दनयनी समन्दिरा निज गन में पहिचान ॥२१॥
 चित्रा चित्त में बसौं सदा केसर रङ्ग अङ्ग जाकी ।
 कांचन वसन जु पहिरै चित्र सेवा हैं ताकी ॥२२॥
 ऐसे चित्राजी कौ हैं मेरे कोटि प्रनाम ।
 निज दासी करि परिकर में राखो हो अविराम ॥२३॥

रसालिका तिलकिनी है निजगण में परबीण ।
 सुगन्धनि सैरसैनी रहै सेवा में लीन ॥ २४ ॥
 एमिलिका कामनगरी सब सखिन अति प्यारी ।
 नागरी नागवैनी मैं जाऊँ बलिहारी ॥ २५ ॥
 तुङ्गविद्याजी को अंग, अरुनता अति भारि ।
 चंदन रंग की ओढ़ै, सदा सुहावनि सारि ॥ २६ ॥
 बीन लै पिय प्यारी कौ निरन्तर राग सुनावै ।
 बहभागी जो तुङ्गविद्या के विमल जस गावै ॥ २७ ॥
 मनुमेधा रु सुमधुरा निज गण में विराजै ।
 मंजुविद्या सुमध्या जु निज परिकर में छाजै ॥ २८ ॥
 मधुरनैनी तनुमध्य है, मधु स्पन्दी कौ प्रनाम ।
 वरांगदा गुनचूडा गावै सुनौ मनोहर तान ॥ २९ ॥
 मुमिरौ इन्दुलेखा इन्द्रमुखिन की है अति प्यारो ।
 हरिताल सम निज अङ्गहि पाँखड़ि अनार सी सारी ॥ ३० ॥
 आभूषण सेवाहि में जु है बड़ी प्रदीन ।
 इन्दुलेखा के चरण में रहौ सदा मन लीन ॥ ३१ ॥
 तुङ्ग विद्या रसतुङ्गा रस की जानै वात ।
 रङ्गवाटी सुसङ्गति इनतें सब सुख पात ॥ ३२ ॥
 चित्रलेखा विचित्रा मिलि इह दोऊ वडावें मोद ।
 मन्दालसा जु मन्दिरा गावें बेद प्रमोद ॥ ३३ ॥
 श्री रङ्गदेवी की सम सखिन में नहिं कोहि ।
 कमल किञ्जलक अङ्ग शोभा पिय प्यारी मन मोहि ॥ ३४ ॥
 जवा पुष्प रङ्ग वसन दर्पन सेवा नित्त ।
 प्रेमानन्द में छके रहैं जुगल रूप निज वित्त ॥ ३५ ॥
 ऐसी रंग देवीजु को करौ निसि दिन ध्यान ।
 नित्त चाहि ले बजरस उपासना की ध्यान ॥ ३६ ॥

कलकंठी शशिकला रहैं पिय प्यारी के पास ।
 मधुरा कमला देवी जु पूरौ मन की आस ॥३७॥
 कन्दर्परूपा इन्दुरा कर जोड़ि करौ प्रणाम ।
 प्रेममंजु कामलता देहु वृन्दावन निज धाम ॥३८॥
 सुदेवी रंगदेवी की रूप समान करि जानि ।
 उमर एक दुहून की इह मन निश्चै ठानि ॥३९॥
 प्याय जल आसन दै स्यामा स्याम के पास ।
 उहै सुदेवी कृपा करौ लहैं वृन्दावन वास ॥४०॥
 कावेरी चाह कवरा है दोऊ परम दयाल ।
 सुकेसी मंजुकेसी की सुनौ वचन रसाल ॥४१॥
 हारहीरा महाहीरा दास्य में है बड़ी प्रवीन ।
 मनोहरि हार कण्ठी सेवा में नित लीन ॥४२॥
 परिकर सह अष्ट सखिन की नैक कृपा जौ पाऊ ।
 प्रिय नम्र सखीन की जस रसना में गाऊँ ॥४३॥
 गुसाईं सनातन प्रकट भे लवंग मंजरी जाय ।
 निज नाम है करि रसना निसिदिन (बीतौ) जाय ॥४४॥
 विजली सम निज अंग है हरिताल रंग की वास ।
 तेर वरष उमर तेरह दिन, रहै प्यारी के पास ॥४५॥
 अरुणवसन पहिरै सदा जब सेवा में लीन ।
 पिय प्यारी रिखावें नित है महा चतुर प्रवीन ॥४६॥
 रूप गुसाईं रूप के प्रकट भए रस राज ।
 रूप मंजरी नाम है सरावै सखी समाज ॥४७॥
 हरिताल केसी जाकी निज अंग अरु रूप ।
 अनार पाँखरी के रँग, पहिरे वसन अनूप ॥४८॥
 नव दिवस तेरह वरस उम्र है नित जाकि ।
 पानदान हाथ लिये सदा सेवा है ताकि ॥४९॥

संसार स्वाद सौ रहे नित निपट है जु उदासि ।
 श्री काहिलीलाल जू के निरंतर करै खवासि ॥१०॥
 श्रीजुत जीव गुसाईं जु मन में सर्वदा ध्याऊँ ।
 बिलास मंजरी जानि कै कृपा तिनकि मनाऊँ ॥११॥
 कुमकुम कैसी वरण है नील वसन परिधान ।
 तेरा वरस आठ दिनरु जानि वयस अनुमान ॥१२॥
 बहुबिधि गंध चंदन लै सेवा करै जु प्रीति ।
 जुगल रूप निरखै सदा प्रेमानन्द निह चोत ॥१३॥
 श्रीकृष्णदास गोसाईं जिनकौ है सुभ नाम ।
 कनक मंजरी सिद्धनाम तिनकौ है सदा जान ॥१४॥
 पीत केतकी निज अङ्ग है तारावलि वसन अनूप ।
 तेरा वरस सात दिवस देखिये अद्भुत रूप ॥१५॥
 पंखा सेवा में रुचि है जाकी अति जु भारी ।
 स्थामास्थाम रीझि करि कबहुँ करत न न्यारी ॥१६॥
 नन्दकुमार गुसाईं जु है जिनकौ विजनाम ।
 नवीन मंजरी प्रगट है पहिरै वसन जु स्वाम ॥१७॥
 मध्य कैशोर वयस है अंग अनूपम पीत ।
 पलंक सेवा में है रुचि बड़ीहि मन में प्रीति ॥१८॥
 ऐसी नवीन मंजरी जू की मेरे कोटि प्रणाम ।
 सदा रसना रटिवौ करौ नवीन मंजरी नाम ॥१९॥
 श्री वजकुमार गुसाईं कौ वंदन करौं कर जोडि ।
 विहार मंजरी सिद्ध नाम रसना रटि जू धोरि ॥२०॥
 कमल कैसी निज अङ्ग है अद्भुत कांति निहार ।
 शिखिपिच्छु कैसे वसन है भूसन सेवा निरधार ॥२१॥
 षट दिन तेरा वरस में रहे ऊमरि अभंग ।
 ऐसे विहार मंजरी में वद्यौ जु मन में रंग ॥२२॥

श्रीलाला वृन्दावन जू ध्याइयै मन में नित ।
 श्री विकास मंजरी गाहयै सिद्ध नाम है चित्त ॥६३॥
 कुंदन केसी घरन है वसन नीलकंठ तूल ।
 तेरा वरस दिन पाँचहि चैवर सेवा अनुकूल ॥६४॥
 श्री गोपीरमण गुसाईं सदा रसना गाऊँ ।
 श्री गुण मंजरी सिद्ध नाम निरंतर ध्याऊँ ॥६५॥
 कमल किंजलक सी तनश्चुति वसन जवा पुष्प रंग ।
 तेरा वरस चार दिन वसन सेवा करै अभंग ॥६६॥
 श्री ब्रजलाल गुसाईं नाम करि हहै जानि ।
 विपिन मंजरी सिद्ध नाम मन में सदा जु आनि ॥६७॥
 चंपकली कैसी है शोभा है निज अङ्ग ।
 अरु नव जलद वसन सखियन के हैं संग ॥६८॥
 तेरा वरष दिन तीनहि जिनकी वयस प्रमान ।
 माला दै सेवा करै पिय प्यारी मन जानि ॥६९॥
 ये विपिन मंजरी की करिलै निसि दिन ध्यान ।
 श्रवण सुनौ बन मंजरी रसना निरन्तर गान ॥७०॥
 श्री गुसाईं नवलाल है महा चतुर सुजान ।
 ललित मंजरी नाम है अंग हेम केतकि समान ॥७१॥
 सुरंग सारी पहिरै जु गावै मनोहर तान ।
 तेरा वरष तीन दिन है ऊमर की अनुमान ॥७२॥
 सेवा संगीत विद्या की बीन लै निसिदिन गाय ।
 जुगल रूप निरखै सदा स्यामा स्याम रिखाय ॥७३॥
 ललित मंजरी कृपा करौ निरखौ मेरो ओर ।
 दीन हीन छारे परै नाहिं मोहि कहुँ ठौर ॥७४॥
 श्री गोविन्दलाल गुसाईं जिनके हैं शुभ नाम ।
 गंध मंजरी सिद्ध नाम है तिनके करूँ प्रनाम ॥७५॥

सोनजुही सी वरण हैं गहरे सोहनि रंग ।
 नील जलद सी वसन सदा पहरे हैं निज अंग ॥७६॥
 तेरा वरस हैं तीन दिन ऊमर कौ परमान ।
 पिकदानी लै सेवा करै रीझै चतुर सुजान ॥७७॥
 गंध मंजरी की मैं तौ जनम जनम की दास ।
 इह आशा पूरी करै सदा लहौं वृन्दावन वास ॥७८॥
 इह मंजरी कहैं और मंजरी अपरम्पार ।
 गुण मंजरी रति मंजरी रस मंजरी निरधार ॥७९॥
 इह सब मध्य किशोर में पहिरै वसन अमूर ।
 कंचन सी निज अंग है निरखौं अद्भुत रूप ॥८०॥
 सेवा करै जु सवनि मिलि समय समय रुचि जान ।
 को कवि ऐसे जगत में ताकौं करै बखान ॥८१॥

इति श्रीभजनपद्मतिग्रन्थे सखी नाम

बर्णनं नाम पंचम विभाग—

सखी नर्म सखी कहौं जथा बुद्धि है मोर ।
 यह परिकर अनंत हैं काहू न पाये ओर ॥१॥
 साधेक भजन हितहि कहौं प्रात समय की बात ।
 जाहि सुनत रसिकन के जु तन मन सबै सिरात ॥२॥
 राति वस बीति गई जब आनि भई प्रभात ।
 लगे मोर शोर करत शुक मारि मनोहर बात ॥३॥
 चिढ़िया चुहूँ चुहूँ करै बोलैं कोइल रसाल ।
 वृंदा सखी सखि वृंद लै जगाएँ मदन गोपाल ॥४॥
 कोऊ गावैं गीत बजावैं चंग उपंग अरु बीन ।
 कोऊ कहै दिरुदावलि रहैं प्रेम में भीन ॥५॥
 रन्द्र जालि कै निरखि सदा पौढ़े जुगल स्वरूप ।
 नील कमल में पीत कमल उरके मनोहर रूप ॥६॥

कान परी सखीन के शब्द पंचिकृत की शोर ।
 लाड़िली जब जागी परी खुली नैन की ओर ॥७॥
 प्यारे कौं जगावै प्यारी फूँक दै नैन मांहि ।
 अंग मोरत उठे जु हरि प्रिया कौ मुख चाहि ॥८॥
 दोड उठि बैठे सेज में शोभा बढ़ी अनूप ।
 खोलि किवार गई सखी सब निरखै जुगल स्वरूप ॥९॥
 आनन्द सों सेवा करै पावै सुखनि अपार ।
 प्रेमानन्द में छक्यौ रहै नाहिं जु आन विचार ॥१०॥
 सैया सौं उठि ठाड़े भये दोऊ स्यामारु स्याम ।
 विद्धुरन दुःख ध्यापि अति चले निज निज धाम ॥११॥
 नाना बिधि जतन करि ल्याये भवन के माहिं ।
 निसि के वसन उतारि कै कीनी दाँतनि चाहि ॥१२॥
 बैठे रतन कि चौकि पर शोभाई असि भारी ।
 सखी सब ल्याई भरी निर्मल जल की झारि ॥१३॥
 अति सुगंधित दांतुन लै दियो सखिन संवारि ।
 आनन्द सों दाँतन करै श्री वृषभान कुंवारि ॥१४॥
 रदन चंद अरु नख चंद ये मिलि भये इक ठौर ।
 चन्द्रमणि की होद तब उमड़ि चले चहुँ ओर ॥१५॥
 सुगन्ध जल सों स्नान करि, पहिरे वसनहिं जान ।
 बैठारे ल्याय आसन परि करकै बहु सनमान ॥१६॥
 सोलह सिंगार करै प्रीति सौ खंडित नारि जू एक ।
 सो सिंगार बरनन करौं, मन में राखि विवेक ॥१७॥
 वैनी गूँथैं कोऊ सखी, पहिरावैं वसन नील ।
 वन्ध लाल सुत की बहुचा बैठें सुहास वरुन सील ॥१८॥
 करण फूल कानन राजै, दाँद वेना लगे अनूप ।
 कवरी में फूलनि गुही, चन्दन चर्चित रूप ॥१९॥

ताम्बूल रेख अधर सोहै धूंघर वारौ केश ।
 चिकुक लगै सुहावनौ, कजरारि नैन विशेष ॥२०॥
 मृग पत्रिका उर में राजै, सुन्दर तिलक बनाय ।
 महावरि रंग सोहै सदा, भानुकुंवरि के पाय ॥२१॥
 नील वसन सुहावनौ, नव धन की सी राजि ।
 विजुरी सी निज अंग, ताके मध्य विराजि ॥२२॥
 पूरणचंद मुखचंद है करिलै मन में ध्यान ।
 कस्तूरी तिलक मृगांक सम करिलै चित में ज्ञान ॥२३॥
 भौहै कमान मनमथ कौ, कटाक्ष है तीकण तीर ।
 आय लगी मन मोहन कौ, है रह्यौ निपट अधीर ॥२४॥
 चंचल अलक सुहावनौ, नैननि काजर रेखि ।
 कीर चौच सम नासिका, रामें सुक्ताफल देखि ॥२५॥
 कुन्दकली सी दन्त है, झलकत चंद समान ।
 कर्णफूल सोभित महा, चिकुक मनोहर जानि ॥२६॥
 रतन जड़ाऊ हार मोतिन की गरै बिराजै सुन्दर ।
 बाजूबन्ध सुहावनौ झवा, राजै मनोहर ॥२७॥
 इन्द्रमणि के चूड वनि सोहै है अति भारि ।
 दस अंगुरिन में मुद्रिका पहरे राधा प्यारी ॥२८॥
 अंगिया सोहै उरोज में कसिकै तनी सवारि ।
 जामै राजत अनुपम चन्द्रसैनी कौ हार ॥२९॥
 नीबी वंध कटी में जु, सौहै अति भारि ।
 छुद धंटिका सबद लगै, सखियन ही कौं प्यारि ॥३०॥
 चरण महावर रचि रहे अरु नूपुर झनकार ।
 अनवट लगे धूंघरु विछ्रवा सब उदार ॥३१॥
 अङ्ग अङ्ग सोभित महा, भूषण नख सिख जानि ।
 नव दुलहिन श्री राधिका, सखियन मध्य मानि ॥३२॥

बात करै नाना विधहि, उपजै रंग अपार ।
 जसुमति पठई सखी द्वै, आय पहुँची तिहि वार ॥३३॥
 सब सखी मिलि आदर कियो बैठी प्यारी पास ।
 भली भई आई तुम, पूजौ मन की आस ॥३४॥
 तब बोली प्रसन्न है, सुनौ सब सखी समाज ।
 आई बुलावन कीरत कुंवरि, चली रसोई काज ॥३५॥
 तब सब मिलि उठि चली, ब्रजरानी के धाम ।
 गुरुजन कौं वंदन करि, जसुमति चरण प्रणाम ॥३६॥
 ब्रजरानी असीस दई, लई गोद उठाय ।
 वहै सुहाग नित ही नित कछु कहौ नहिं जाय ॥३७॥
 ब्रजरानी आज्ञा दई, लई मस्तक में धारि ।
 तब रसोई गृह में गई, करै नाना उपचार ॥३८॥
 इह विधि परिचर्या करै, रहै निरन्तर लीन ।
 गोविन्द गुण गावै सदा, है सब चतुर प्रवीन ॥
 अब कहुं प्रात समय जो, लीला करै घनश्याम ।
 कुंज भवन ते निकसि कै, आनि पहुँचे निज धाम ॥४०॥
 रतन चौकि पर बैठे हरि मिले सखा सब आय ।
 सुगंध जल सौं दौतन करै, कछु मधु सौ वतराय ॥४१॥
 हास्य करै नाना विधि जु, कोऊ अन्त नहि पाय ।
 तब दोहिनी लिवाय कै, खिरक में हरि जाय ॥४२॥
 ठाडे है दुहावे दूध, दोडे अपनो हाथ ।
 पाछे दूत पहुँचे सब, जहां रहे यशोदा मात ॥४३॥
 तब निज गृह आवे हरि, स्नान करावै दास ।
 सब अंग पौछिकै पहिरावे, पीत मनोहर बास ॥४४॥
 आसन में बैठे हरि, बनायें तिलक अनूप ।
 सन्ध्या वन्दन आदि करि, निरखै आप स्वरूप ॥४५॥
 तब आभूषण प्रीति करि, सब दास ले आवै ।
 अति आनन्द सौ निज अंग में लै लै पहिरावै ॥४६॥

मोर सुकुट सीस सोहै, कुण्डल की छवि न्यारी ।
 शुँघर बारि अलकै झलकै, नासा सुक्ता छवि भारि ॥४७॥
 भाल तिल सुन्दर सोहै, केसरि खोरि बनाय ।
 मुखचन्द अति सुहावनौ, मनमथ देखि लजाय ॥४८॥
 कंठ सोहै कौस्तुभ मणि, उर मोतिन की भाल ।
 चौकी चमकै सुहावनी, जामें अनुपम लाल ॥४९॥
 बाजूबंद मनोहर सोहै, कर में कडा अनूप ।
 कटि किंकिणी सुन्दर वाजै, निरखौ श्यामस्वरूप ॥५०॥
 नूपुर सोहै चरण में, भाभन की झनकार ।
 मनोहर राजत धूँघरू, सवद करै झनकार ॥५१॥
 हह विधि शृंगार करि हरि बैठे आसन माहि ।
 सखागन सब सङ्ग लै, पहुँचे हलधर आय ॥५२॥
 हरि तब उठि ठाड़े भये, बल कों करें प्रणाम ।
 दुहुँ परस्पर मिले तब, बैठे एकहि ठाम ॥५३॥
 सखा मण्डली मध्य विराजत, हलधर नन्दकुमार ।
 सुवल मधुमंगल आदि लै, सोहै सखा अपार ॥५४॥
 हास्य रस में मधुमंगल, है जु परम प्रवीण ।
 उज्ज्वल सुवल शृंगार में, रहै निरन्तर लीन ॥५५॥
 श्रीदामा सख्य रस में, है जु परम सुजान ।
 केलि करै नाना विधि वजजन कहै जु श्राण ॥५६॥
 सब सखा मिलि चले तब, वजरानी के पास ।
 दुरतें देखि पुत्रन कौ, मन में भयौ उल्लास ॥५७॥
 कृष्ण अरु वलदेव दुहुँ, आय कियौ प्रनाम ।
 वजरानी उठि मिलि तब, कंठ लग्यौ घनस्याम ॥५८॥
 विप्रत्रियान कों प्रनाम करि, परे रोहिनी पाय ।
 प्रेम सौं दोऊ आत कौं, लई अंक लगाय ॥ ५९
 पूरणमा वृंदा सहित, आई मन में हुलास ।
 कृष्ण रूप निरखि चली, वजरानी के पास ॥ ६० ॥

आनि पहुँची सभा मध्य, आनन्द बद्धौ अपार ।
 घजरानी वंदन करै, लियै सबै परिवार ॥ ६१ ॥
 ता समें दान करै दरि, नैकहु कह्यौ न जात ।
 कंचन सहिन घृत पान्र में, देति विप्रन को हाथ ॥ ६२ ॥
 गाभी सुवर्ण आदि लै, करै नाना विधि दान ।
 पहिरावनि पहिरावै, बहिनी कौ है सनमान ॥ ६३ ॥
 घजरानी पै आज्ञा लै, पाक साला में जाय ।
 पंगति करि बैठे सब सखा निकट बुलाय ॥ ६४ ॥
 झारी भरि लाई ललिता, धर्यो जु बायें ओर ।
 आगे थाल सुहावनौ, झलकत कंचन कोर ॥ ६५ ॥
 प्यारी थाल सजायकै, दियो रोहिणी हाथ ।
 तब रोहिणी पारस करै, जिमावै यशोदा मात ॥ ६६ ॥
 प्रथम अल्प पारस करै, व्यंजन धरे अपार ।
 खीर सिखरिनी चलावै, तब जीमें नंदकुमार ॥ ६७ ॥
 सखा सब मिलि जीमें, तब सरावै बारम्बार ।
 मधु मंगल तब हास्य रस, कीनौ अति विस्तार ॥ ६८ ॥
 रामकृष्ण जीमें दोऊ, जिमावै यशोदा मात ।
 सुगंध जल आचमन करि, बीरी सब मिलि खात ॥ ६९ ॥
 ललिता बीरी बनाय करि, कृष्ण निकट षठाय ।
 बीरी चतुराई देखि, मधु मंगल मृदु मुसकाय ॥ ७० ॥
 कृष्ण मधु के कान में, कही अनुपम बात ।
 इहाँ कछु कहो मति, बैठे गुरजन हलधर आत ॥ ७१ ॥
 तो न कहौं मैं तेरे सब चतुराई ।
 जो कछु देवो मोहि, तुम कुंवर कन्हाई ॥ ७२ ॥
 इह विधि नाना आनंद सौ, बात सभी बतराय ।
 जसुमती प्रियावृद कौ, प्रोति सौं दई जिमाय ॥ ७३ ॥
 जसुमति हरि कौ शङ्कार करि, बनावै नटवर वेष ।
 जूँडा मनोहर वाँधि तब, घूँघर वारे केश ॥ ७४ ॥

भाँति भाँति के रतन सौ, जूङा अनूपम सोहै ।
 श्रलक तिलक सुधारि कै, नर नारिनु मन मोहै ॥ ७५ ॥
 चिबुक चन्द्र सी चमक रही, डिठौना मुख के माँझ ।
 अंग अंग भूषण सजे, सजी मनोहर साज ॥ ७६ ॥
 फेट में उरसै बाँसुरी, लाल छरी लै हाथ ।
 बलदाऊ कौं बुलाय कै, सोपै यशोदा मात ॥ ७७ ॥
 ग्रह में रक्षा मैं करी, वन में राखि तु आत ।
 निपट भोलौ गुपाल है, जानी न एकौ बात ॥ ७८ ॥
 जल थल सों रक्षा करि, रहियो संगहि संग ।
 वन में सुने रहे निरन्तर, विषधर विषम भुजंग ॥ ७९ ॥
 एहि विधि नाना शंका करि, कहि न सकत कछु बैन ।
 रक्षा-बन्धन मन्त्र पढ़ि, नीर भरि भरि डारै नैन ॥ ८० ॥
 तब एक सखा कहो अब, मति करौ कोऊ देर ।
 गाय खिरक अरवरात है, भई वन की वेर ॥ ८१ ॥
 सब मिलि प्रणाम करि, चले नंदराज के ठाँव ।
 बन चलिवे को आज्ञा लिये, किये वहुत परनाम ॥ ८२ ॥
 व्रजराज तब हिलै मिले, करि नाना विधि बात ।
 कृष्ण वल कौं आज्ञा दिये, आये खरक लौं साथ ॥ ८३ ॥
 गो चारण को चले हरि, वजावे बैन घनघोर ।
 आनंद सिंधु उमड़ि चल्यौ, व्रज के ही चहुँ ओर ॥ ८४ ॥
 आगे धेनु करि लिये, सखा मण्डली पाढ़े ।
 कोऊ सखा नाचत चले, सुंदर काछिनी काढ़े ॥ ८५ ॥
 व्रज की गली अति सांकरी, जुरे सखान की भीर ।
 ठठकि ठठकि चलै हरि, संग लिये घलवीर ॥ ८६ ॥
 बाँसुरी बजावे जु हरि, भयौ सबद रसाल ।
 व्रजनारी अटा चढ़ि निरखै मदन गोपाल ॥ ८७ ॥

इह विधि प्रात समय करै, लोला श्री हरिराय ।
 संक्षेप सौं बरन्यौ कछु, भजन पद्मति माहि ॥८॥
 इति श्री भजन पद्मत्यां प्रातलीला वर्णनं

षष्ठि विभाग

हास परिहास करै जब, चलै चलि वन में धेनु ।
 दिसा दसों पावन करै, उड़ै चरण की रेणु ॥१॥
 नाना विधि क्रीड़ा करै, नित त्रुंदावन मांहि ।
 सखा सवन संग लिये, मोहन गाय चरांहि ॥२॥
 जब गौधन तृन लोभ, में दूर पहुँचे जाय ।
 अधर में मुरली धरे, लै लै नाम बुलाय ॥३॥
 गंगा यमुना अरु काजरि, धूमरि पीयरि गाय ।
 श्याम अंग के सुगंध लैत, तवही पहुँचे आय ॥४॥
 पिसंगी मणिकस्तनी, श्याम कौं अति प्यारी ।
 प्रनत शृंगी पित नयनी, द्वै आवै सबते न्यारी ॥५॥
 मृदंगमुखी धूमलि की, प्रीति कही नहीं जात ।
 जहां देखें श्री कृष्ण कौं, तहां भाजी हीं जात ॥६॥
 वंसीप्रिये हंसिनी, जब सुनै सबद रसाल ।
 तबहि पहुँची आनिकै, निरखे मदन गोपाल ॥७॥
 सुरभी सब देखि हरि, आनिहि अपने पास ।
 जमुना जल प्यावें तब, लिये सखा सब दास ॥८॥
 पाढ़े जल बिहार करै, जमुना जल के मांहि ।
 ता समै छाक पहुँचि, आय सखा संग ले खाहि ॥९॥
 बन भोजन की शोभा, कछु कही नहिं जाय ।
 चतुरानन देखि विस्मय भये, और लोक की नाय ॥१०॥
 कोऊ सखा सज्या रचै, लावै पत्र अरु फूल ।
 उपरि छाया द्रुमन की, निकट जमुना कूल ॥११॥
 त्रिविधि पवन आवै जहां, सीतल सुगंध रुधीर ।
 आय पौढ़े जुवराज कृष्ण, चहुं और सखन की भीर ॥१२॥

कोऊ चरण सेवा करै, बिजना कोऊ दुराय ।
 कोऊ छड़ी लै ठाड़ौ रहै, कोऊ विरदावलि गाय ॥१३॥
 राज उपचार लीला करै, श्रीवृजराजकुंवार ।
 महा आनन्द उपजै सदा, को कवि पावै पार ॥१४॥
 और अनेक लीला करै, वन में चतुर सुजान ।
 अधर में सुरली धरै, गावै मनोहर तान ॥१५॥
 जा सुरली धुनि सुनि, ब्रजदेवी भई अधीर ।
 घर बार सब भूलि गई, उपजी मन में पीर ॥१६॥
 तब नाना उपहार लियै, पहुँची वन के मांहि ।
 कालीदह के निकट, ठाड़ी हरि मुख कौ चाहि ॥१७॥
 हरि तब मिस बनाय कै, आये वाही ठौर ।
 प्यारी बीच लिये ठाड़ी, निरखै सखीन के कौर ॥१८॥
 तब कृष्ण आनंद है, मिले श्यामा कौं आय ।
 तब झूला डरे तहां, गीत मनोहर गाय ॥१९॥
 सरस हिंडोरा जु बन्यौ शोभित कंचन खंभ ।
 नाना विधि रतन जटित, निरखत लगै अचम्भ ॥२०॥
 चाह डाँड़ी सरल सुन्दर निरखि अनंग जु लाजै ।
 पटुली पिरोजा लगी अनुपम, काम जड़ाऊ साजै ॥२१॥
 लाला फौदा लटकै अद्भुत शोभित नाना रंग ।
 सखी मिलि झुलावै जब उपजै प्रेम तरंग ॥२२॥
 मरुवा में मानिक जड़ी, चुनी लगी अति भारी ।
 हीरा चमकत चंद से, रचि पचि सखी सवारी ॥२३॥
 उपरि कलस सुहावनौ, शोभा कहि नहि जाय ।
 चहुँ ओर ते झुकि रही, कलपतरून की छांह ॥२४॥
 नवल हिंडोरा सुहावनौ, जुरे सखी समाज ।
 नव मोहन राधिका राजै, पहिरै नई-नई साज ॥२५॥
 नवल सखी झुलावै, तब उपजै नव-नव रंग ।
 श्यामा श्याम दोऊ मिलि, है गए एक हिं अंग ॥२६॥

जबहि हिंडोरा भमकि सौ निकट जमुना के जाय
 तब प्यारी डर मानिके स्याम अंग लपटाय ॥ २७ ॥
 अद्भुत शोभा होय तब, कछु कह्यौ नहिं जाय ।
 ज्यों दामिनि नव धनहि में, मानौ जाय दुराय ॥ २८ ॥
 दोऊ रूप सुहावनौ, दुहुत के एकई मेलि ।
 नव तमाल सौ लपटि रही, ज्यों कंचन की बेलि ॥ २९ ॥
 इह विधि झूलै दोऊ, रसिकन के सिरमौर ।
 दोऊ ओर खोभित महा, नर्म सखिन के कोर ॥ ३० ॥
 लक्षिता झुलावै दाहिनै, संग लिये मंजरी रूप ।
 झोटा देत विशाखा जु, लबंग मजरी अनूप ॥ ३१ ॥
 पुनि दाहिने चित्रा जु, चम्पकलता को जानि ।
 वायें ओर रंग देवि, सुदेवी कौ पहचानि ॥ ३२ ॥
 तुंग विद्या सनमुख गावें, भाँति भाँति की तान ।
 सग सब सखी बजावे, है महागुनन निधान ॥ ३३ ॥
 अद्भुत बाजा बजे जहाँ झृदंग रवाव अरु बीन ।
 कोऊ चंग उर्पंग बजावै, हूँ प्रेम में लीन ॥ ३४ ॥
 जब तुंगविद्या सुधारि कै, तीन ग्राम कौं लेत ।
 छहाँ राग छत्तीस रागिनी सरस सुरन तब देत ॥ ३५ ॥
 राग निज रूप धरि राजें भूषण बसन अनूप ।
 गावें मनोहर ताननि निरखें जुगल स्वरूप ॥ ३६ ॥
 मुरज मुहचंग के सबद रही धनघोर ।
 वाँसुरी वेणु कौं सुर छाय गयौ चहुँ ओर ॥ ३७ ॥
 सितार तम्बूरा कोऊ, सखी अनूप बजावै ।
 गन्धर्व कला में प्रवीन श्रति, स्यामा स्याम सरावै ॥ ३८ ॥
 द्रुमलता सब रीझि रही, बड़ी प्रीति अपार ।
 परत पराग सुहावनौ, अरु मकरंद फुहार ॥ ३९ ॥
 मधुर मधुर बाजा बजैं, गावै न्याहो न्यारी तान ।
 निज कंठहार उतारि कै, देत पिय प्यारी जान ॥ ४० ॥

चोषठि कला में प्रवीन हैं, दोऊ बड़े रिखवार ।
 वीन लै बजावै गावै, मोहि लिए नरनारि ॥ ४१ ॥
 इह विधि मूलैहि सदा, दौऊ रसिक सुजान ।
 अनेक सुख उपजै जहाँ, को कवि करै बखान ॥ ४२ ॥
 सब बासर बोति गई, रहि जब थोड़ौ आय ।
 हिलि मिलि प्रिया सब, निज भवन में जाय ॥ ४३ ॥
 हरि मिले सब सखन सौं, बुलाय लई सब धेनु ।
 निज भवन कै सनमुख करै, बजावै अद्भुत बैन ॥ ४४ ॥
 फूलनि के सिंगार करे, पहिरावै बनमाल ।
 आगे धेनु चलावै, पाछे चलै नंदलाल ॥ ४५ ॥
 काच सखा पहिरावै, पचरंग थाक के हार ।
 चंपा चमेली सोहै और, बकुल कुंद मंदार ॥ ४६ ॥
 कस्व गुंजा भूषण पहिरें, शोभा भई अपार ।
 हुङ्कार सबद करि गौ चले पाछे नंदकुमार ॥ ४७ ॥
 मंदगती सुरभी चलै, मधुर बजै तब बैन ।
 त्रिलोकी पावन करे, उडे जु खुर की रेंन ॥ ४८ ॥
 ब्रजरानी आरती लिए रहै द्वार में ठाड़ी ।
 कब आवै मेरे पुत्र लाडिलो बनवारी ॥ ४९ ॥
 अटा चढ़िकै निरखै, सब ब्रज के हैं नरनारि ।
 बैन सबद सुनि रहे, मारग माहि निहारि ॥ ५० ॥
 आवै हरि आनन्द सौं, लिये सहचरि बृंद ।
 अचरज शोभा हौ रही, ज्यौ तारा में चंद ॥ ५१ ॥
 लाल छड़ि फिरावत आवैं, गवैं गीत अनूप ।
 जाली हौ निरखै सखी, सुन्दर प्यारे कौ रूप ॥ ५२ ॥
 ठठकि ठठकि आवै हरि, ब्रज बीथिन भई भीर ।
 कौऊ सखा नाचत चलै, सरावै आप बलवीर ॥ ५३ ॥
 इहविधि पहुँचे आय के बनवारी द्वै भाई ।
 ब्रजरानी सौं आय मिले, खिरक पहुँचाये गाय ॥ ५४ ॥

आरती उतारी प्रीतिकरि, कीनौं बहुत न्यौछारि ।
 घर मैं लै गई आनंद सौ, बन की सिंगार उतारि ॥५५
 अंग पोछैं अचरा करि, कछु मिष्टान्न खवाय ।
 बन की बात बूझैं सब, बासर की तपत बुझाय ॥५६
 उबटन करि नव्हाय पहिराय धोवति लाल ।
 चन्दन की खौरि करि, सोहे मदन गोपाल ॥५७॥
 जूरा के बाल खुलि रहे, चूरा कर में सोहि ।
 कौधनी कमर में सोहि, देखि मनमथ लाजोहि ॥५॥
 पावरी पाव में दिये, सखा बृंद लै संग ।
 अदाय सौं चलै हरि, उमड़ी रूप तरंग ॥५८॥
 खिरक जाय ठाडे बुलावै, गायन कौं लै नाम ।
 दोहैं दूध आनन्द सौं, दोहनों लैं धनश्याम ॥५९॥
 सब दूध दुहाय पठाय, निज भवन के मांहि ।
 सखा गन सब संग लिये, बैठे बैठक जाहि ॥६०॥

इदि श्री भजनपद्मतिग्रंथे गोष्ठवर्णनं सत्तम दिभागः

नाना विधि बातें करें, करै हास परिहास ।
 भोजन काज बुलावन आये, वाही समै निज दास ॥१॥
 तब उठि ठाडे भये, कीये सखन विदाय ।
 दासगण सब संग लिये, पाक भवन में जाय ॥२
 सब मिलि जोमै तब, जुऽचौं बहुत समाज ।
 रोहिणी तब पारस करै, परजन्य गोप के माझ ॥३
 नंद उपनन्द राजै तहाँ, सुनंद अरु अनुनन्द ।
 मध्य में राजै गोविंद, ज्यौं पौर्णमासि कौं चंद ॥४
 आनन्द करि जीमै सब, बैठे सभा में जाय ।
 सब मिलि बोरी खाय कै, लियौं श्रीकृष्ण बुलाय ॥५
 विप्र गण आवैं तब, कहै पुराण इतिहास ।
 नृत्यकामी तब नृत्य करें धरें नाना विधि हास ॥६

कृष्ण वलराम सौ नित, परिजन्य कहै रसवात ।
 दोऊ आत बोले जब, फूले अंग न मात ॥७
 बहुत राति बीतै जब, चले गृह बुजराज ।
 श्री कृष्ण पाले चले, मिलि सखी मारग माझ ॥८
 मंद मुसिक्याय बात कही, सखी है चतुर सुजान ।
 तुम बिन छिन छिन प्यारि की, जुग बीतै कोटि समान ॥९
 विलम्ब न करो हरि अब, चलौ जु याही बार ।
 ठाड़ी है निरख प्यारी, आय निकुंज के द्वार ॥१०
 तुम बहुरंगी हौं महा, कोउ अन्त नहिं पाय ।
 कौतुक सब छोडि देव, चलौ मोहन मंदिर माँहि ॥११
 तब कृष्ण पहुँचे जाय, मोहन मंदिर माझ ।
 देखि उठि ठाड़ी भई, तब सब सखी समाज ॥१३
 तब ललिता ठाड़ी है, कहि बात अति प्यारी ।
 मंदिर आय पहुँचे हरि, करौ चलिवे की त्यारी ॥१४
 बाही समै विशाखा करि, ल्याई बसन सब त्यारि ।
 पहिरावै निज हाथ करि, श्री वृषभान कुंवारि ॥१५
 ता समै मृग पत्रिका दीनी, प्रीति सौ चित्रा बनाय ।
 चंपक लता चँवर करै, मंद मंद मुसिक्याइ ॥१६
 सुदेवी बैनी गुहै रंग, देवी दर्पन दिखाइ ।
 लवंग मंजरी भारी लियै, पहुँची तब ही आय ॥१७
 पान दान हाथ लीयै, सोहै मंजरी रूप ।
 बात करै रति मंजरी है गुन मंजरि अनूप ॥१८
 विलास मंजरी सुगंध लियै, रस मंजरी है सग ।
 खौकी पर बैठारि कै, लगावै प्यारि के अंग ॥१९
 विजन दुराय कनक मंजरि, नवीन मंजरी पास ।
 भूषण विहार मंजरि रचै, शैश्वा मंजरि विकास ॥२०
 गुण मंजरी नैनन में काजर ले लगावै ।
 विपिन मंजरी पंचरंग, हार लै पहिरावै ॥२०

रतन मंजरी प्यारी के, चर्ण महावर जाय ।
 पिक दान लिये गँध मंजरी, निकट हुँ पहुँचाय ॥२१
 और सब सखी मिलि कीने, अपने अपने काम ।
 प्यारी को वे जै चलीं, मिलावन घनस्याम ॥२२
 हंस गमिनि पिय मिलि चलीं, राखि भुज में भुज वाम ।
 जब धरि चरण सुधारि कै, देखि मोहि तव काम ॥२३
 सोलौं सिंगार सोभित अरु, राजै भुषन अनूप ।
 जृध्य करन चल्यौ मनौ, आप मनमथ भूप ॥२४
 सखि समाज सब सैन्य है, निज अंग के माह ।
 मन तुरंग में चढ़ि चली, नूपुर माझ जगाह ॥२५
 भोंह जुग कमान है, कटाक्षन तीछन तीर ।
 निज निज मिसल में चली, इक इक अनुपम बोर ॥२६
 इहि विधि पहुचाई प्यारी, मोहन मन्दिर जाह ।
 मिले हरि आनन्द सौ, वैठि आसन माहि ॥२७
 तव जो जो सोभा भई, कछु कही नहिं जाय ।
 इन्द्रमनि के पर्वत सौ, मिले कंचन गिरि आय ॥२८
 परसपर बातें करें, उपजै अनंद अपार ।
 सखी सब चरचा करै, दुहु मन जानि विचार ॥२९
 ललिता बोरी देत तव, चम्पक चबर ढुलाय ।
 तुंगविद्या बीन लं, राग मनोहर गाय ॥३०
 नाना विध बाजै बजै, है रह्यौ सबद रसाल ।
 कोऊ सखी नृत्य करै, राखै अनूपम ताल ॥३१
 नाना विलास है है तव, निज अंगन के माहि ।
 जो सुख सब उपजै वहाँ, नैक वरन्यौ नहिं जाय ॥३२
 तव ललिता कटोरा भरि, दीनी दूध सौं ल्याह ।
 पीथें हरि आनंद सौं, प्रिया पाछे पियाह ॥३३
 अरस परस पीथै दोउ, मंद मंद मुसिकाय ।
 लखित मंजरि शोभा निरखि, वार वार वलि जाय ॥३४

आचमन करें दुहुँ मिलि, ललिता मूख धुवाय ।
 नाना सुगंध मिश्रिता वीरा, पिय प्यारी मिलि खाय ॥३५
 विकास मंजरी सैया रची, विनती करी जब आय ।
 तब प्यारी प्रिय दोऊ मिलि, पौडे सैया माहि ॥ ३६
 गौर स्याम निज अंग है, निल पित वसन अनूढ़ ।
 नव घन में आनि मिली, थिर दासिनी रूप ॥३७
 दुहुँ मिलि पौडे तब, भुजा परस्पर मेलि ।
 नव तमाल में लपटि रही, मानों कंचन वेलि ॥३८
 इह विधि विहरे सदा, वृन्दावन के माहि ।
 श्री गुरु कृपा है है तब, देखन कौं पाहि ॥३९
 जब गुरु देव कृपा करि, सिद्ध देह कौं देहि ।
 सेवा में नियुक्त करि, अपनौ करि कै लैहि ॥४०
 जो जाने यह पद्धति, कृष्ण भजन कौं सार ।
 वह उतरें भव समुद्र कौ, यह जानौ निरघार ॥४१
 कृष्ण प्रेम पावै सदा, कृष्ण भजन में लीन ।
 कृष्ण बिना जीवै नहीं, ज्यों जल नरसै मीन ॥४२
 हहि विधि साधन करें, साधक देह के माहि ।
 मिद्ध देह में हरि मिले, निश्चय जानो ताहि ॥४३
 इह पद्धति कह्यौ सब साधक भजन वे काज ।
 सुँ सुनावैं जो कोऊ हरि मिले रंग समाज ॥४४
 मंवत अठारह सौ चालिसा पूरण कागुन मास ।
 इह पद्धति पूरण भयौ, पूजै मन की आस ॥४५

इति श्रीभजनपद्धतिग्रंथे रात्रिविहारलीला
 वर्णनं नाम अष्टम विभागः

सम्बृद्ध १८५० स्व अज्ञर मिदं गोकुल
 दासस्य शुभमस्तु ।

भजनपद्धतिग्रन्थकार की गुरुप्रणालिका—

श्रीश्रीजीवगोस्वामीजी

श्रीकृष्णदासगोस्वामीजी

श्रीनन्दकुमारगोस्वामी

श्रीब्रजकुमारगोस्वामी

श्रोलालावृन्दावनजी

श्रीगोपीरमणगोस्वामीजी

श्रीगोस्वामीनवलालजी

श्रीगोविन्दलालजी गोस्वामी

ग्रन्थकार

अब तक प्रकाशक के द्वारा

प्रथम संख्या

ब्रजभाषा में

(सानुवाद) संस्कृतभाषा में

समीक्षा

कुल संख्या १०



पुष्पराज प्रेस, मथुरा।